

ÉXODO

Jawen unanmati janchaki

Jaska jatun xenipabu yubani keska wakin Israelin enabu Egipto anua Diosun jatu taxnimabainkin jawen kushipajaida inun jawen kena kayabi Jehován jatu unanmanikiaki, mai jidabi anu nawa tibi jiwebaunabudan. Jaskakubainibuwen taexun na una “Éxodo” kenanibuki, nukun jancha yuiadan, “Taxnibainibuki.”

Israelin enabu katukin ibuwani xun Diosun jatu mekekubainkin jatu putama Criston xenipabu Diosun jatu waniki. Génesis anu miyui taewakin na una anu jabias miyui kakunkaini Moisin jatu kenemanikiaki, ja añotian 1450-1410 Cristo judiamadan.

Egipto anua Israelbu paibu jatu nuitapawakubainibukiaki, na janchadan

1 ¹ Israel, jawen kena betsa Jacob Egipto anu jawen bakebuya jikinikiaki, jabu tibi jawenabuyadan. ² Jawen juni bakebudan, Rubén inun, Simeón inun, Leví inun, Judá inun, ³ Isacar inun, Zabulón inun, Benjamín inun, ⁴ Dan inun, Neftalí inun, Gad inun, Aser Egipto anu jatun epabe jikinibukiaki. ⁵ Ja dukun jawen bake José kaniki dasiabu Jacobun enabu tanabudan, 70 yudabu Egipto anu jatuki dasitan jiwei taenibukiaki.

⁶ Ja dukun Jacob mawaimaken chipu José inun jawen betsabu inun jati Jacobube Egipto anu jikinibudi mawakubainaibun ⁷ jakia Israelin bababu pai bake ichapa pawakin jatun mai pakea jatu achin keyui ana pachakayamai kushipai jiwekubainkin jatun mae anu jiwei nati ikaibun

⁸ chipu Egipto xanen ibujaida Faraón bena xanen ibui taekin jaska Josén jawenabu medabewapauni unanmatun xanenibun jawenabu jatu yuikin: ⁹ “Uinkanwen. Israelin enabu pachakayamakin kushipakin nuku binupai ikanikiki. ¹⁰ Jaskakenan, jawadawen jatu bextekubainankanwen. Nun jatu jaska wama ana pakin nuku binujaidaibun tsuabuda nukuki sinatakin nuku detenun ika beaibun Israelin enabu pajaidakin nukuki sinatakin jabuki dasitan jatubetan nuku detebaini Egipto anua paxai keyutidubuki”, jatu wa

¹¹jaska jatu yunua chibankin Israelin enabu jatu ichakawakin jau jabun jatu uinkin jatu dayama chakayamanunbun jatu yunuabu jatu bika tenemakin jatu dayama chakayamakin janu piti aduti maewan dabe Pitón inun Ramsés Egipto xanen ibu Israelin enabun jau benixununbun jatu yunua axunkubainaibun ¹²jatu dayamakin jatu bika tenemabiabun jabiasabiaken ana pajaidaibun janua Egipto nawabu jatuwen datejaidakin

¹³Israelin enabu ana jadakidi kainkaintima wakin jatu esclavo tsuma waxun jatu kusha chakayamakin ¹⁴jatun jiwea bikawakin jatuki besti chiti itan jatu daya kushipajaida jatu amakin ja jiwe wati mai basi jusia jatu pewamakin betsabudi jatuki sinatabetanan bai anudi jatu dayamakin jatu jaska wakin Israelin enabu Egipto nawabun jatu nuitapajaidawanibukiaki. ¹⁵Januxundi Egipto xanen ibujaidatun bake kainmanika dabe Israel ainbu dabe jatun kena Sifrá inun Puádan, ja dabe jatu kenaxun jatu jancha wakin jatu yuikin:

¹⁶—Matunabu bake kaiainbu jatu kainmakinan, jawa bake ikimenkain uintan jatu medabewakubainxankanwen. Juni bake kaianyakan, jatu tenankubainxankanwen. Jamen ainbu bake kaianyakan, jenexankanwen— akin jatu yunua

¹⁷jakia jatu jaska wabia jabun bake kainmamisbun jawa xanen ibun yunuti jancha ninkaxunama Diosun kushipaki mesei datekin juni bakebu kaiain jawa jatu meama jiwemakubainaibuwen taexun ¹⁸Egipto xanen ibun ana jatu kenamaxun jatu ja akin yuikin:

—¿Jaskakin juni bakebu kaiain man jatu tenanma jatu jiwemakubainai?— jatu wa ¹⁹bestichaitun xanen ibu yuikin:

—Nuku nun Hebreo ainbuaibudan, Egipto ainbu nun keskabumaki. Nun kadiamaken juinti kushitan jawaida ibubis jatun bake kainmisbuki, nun jatu medabewadiamadan— aka

²⁰jaskaken bake kainmanika ainbuaibu Diosun jatu medabewaya janua Israelin enabu pai kushipai ana ichapajaidakubainaibun ²¹bake kainmanika ainbuaibu Diosun kushipaki meseaibuwen taexun jawenabus pawakin Diosun jatu medabewakin pewakubainikiaki. ²²Ana jawawen jatu nematima Egipto xanen ibu Faraónen jawenabu dasibi yunukin: —Hebreo juni bakebu tibi kainyain jatu mebintan nukun jene anu pukukubainkanwen, jakia jatun ainbu bakebu besti kainyain ja jatu jenexunkubainkanwen, jau jiwununbunan— jatu wa jaska jatun xanen ibun ma jatu yunua akin taewabainaibun

Moisés kainikiaki, na janchadan

2 ¹Israelin juni bake Levín enabu betsan Levín janubi jawenabu kayabi ainbu bikin ainwantan bake wakubainaya juni bake bestichai inun ainbu bake bestichai kainmanixun ²ana juni bake

betsa bima june pustukin bachi xaxa sawemis atimas kaian juni bake jawenduajaida uintan jau jene anu putayamanunbun yaushitan uxe dabe inun besti june yumewakin ³ jakia jawen ewan shinankin: “En ana june yumewatidumaki”, ixun chichan ewapa bixun jawen xui buiwen buyakin keyuxun chichan jabatiudi bixun jadi buiwen xui buya keyutan jawen bake chichanki nanetan chichan betsawen beputan yumewen mawexetan buxun jene pasu anu xachiwan nakumakin nuntantan nunuken ⁴ jawen ainbu bake yuikin: “Ea uindaxunwen, jaskaimenkainan”, aka benanta junexun jawen chipin manaya

⁵ chipu Egipto xanen ibujaida Faraónen ainbu bake nashi jui jawen medabewanikabu chipashbube jene ketanbainkin xachiwan medan chichan nunua bechitan jawen medabewanika yunua chichan jenen nunua nexexun bexun ⁶ bepenxuna xanenibun baken uian juni bake kaxaya jawen nuikin yuikin:

—Nadan, Hebreo bakeki, Israelin enabudan— akaya ⁷ janua jawen chipi junea taxnikidan juxun xanenibun bake bechipsaiaya yuikin:

—Jau mia chuchu amaxunkubainun ¿enabu chuchuya mia yuixuntanpa?— aka ⁸ Egipto xanenibun baken yuikin:

—Itanwen— aka kushikaini kaxun ja kainma jawen ewa kayabi jaskaxu yuia jawaida kushikidani ⁹ jatuki nukua Egipto xanenibun baken yuikin:

—Na bake en bixudan, mian ea yumewaxuntanwen. Min ea chuchu amaxunaya en mia pakakubainxanaii— aka ja bake ibuan iyuxun chuchu amaxunkubainkin ¹⁰ ma yumewaxuntan iyuxun Egipto xanenibun ainbu bake inantan ibu ma kaken xanenibun baken jawenabu yuikin:

—Na bakedan, enamabia ena kayabi en waii. Jene anua en nexeimawen taexun jawen kena Moisés en waxuki— jatu wa

Egipto anua Moisés paxai kainkainikiaki, na janchadan

¹¹ ma badi ichapajaida kaken Moisés ma juni ewajaidatun jawenabu Hebreo nawabu uin kaxun jatun daya bika daya chakayamaibun jatu uinbaunkin jawenabu Hebreobu bestichai Egipto nawa pubenen kusha kusha akaya bechitan ¹² datekin uiankeaketan janu tsua niamajaidaken jawenabu jatu manakuxunkin Egipto nawa kushakin tenantan janubi mashi basantan datanxun achimatan inun ka ¹³ uxashini bestentan ana jawenabu uinun ika kaken jawenabu Hebreo dabedi ja idabei detenamediaibun bechitan ja juni puben Moisin yukakin:

—¿Jaskai yuda betsai ikaskin janubi minabu min kushai?— aka juni pubenen yuikin:

¹⁴—¿Tsuam mia xanen ibu waimamen? Mian daki min jatu unanti wamiski, kupikiran. Min Egipto nawa tenanshina keska wakim min daki eadi tenanun ika ikaii— aka Moisin ninkatan datekin shinain:

—En deteshinken dasibitun unankanikiki— ika ¹⁵jaska Moisin ashinken Egipto nawa xanen ibu Faraónen tapintan manakukin tenanpanan Egipto anua Moisés badi juaikidi paxai kai mai betsa tsusinjada pukebaini uke betsaudi Madián nawabu anu jikitan unpax biti kini anu ma kema tsauken

¹⁶ unpax beatiwen jawen amati mata waxun jatun epa Reuelin chaxuwan ichapa unpax amanun, iwanan, Madián nawa Diosbe janchaxunikan ainbu bake chipashbu 7tun jatun epan chaxuwan dasibi iweabu ¹⁷jakia chaxuwan uinika betsabu bexun unpax yaushikin chipashbu jatu nema taewaibun Moisés benikaun jatu nemaxunkin chaxuwan uinika betsabu jatu nichinxuna buaibun jatu medabewakin unpax beatantankin chipashbun chaxuwan amaxunken ¹⁸janua jatun chaxuwan iyui jatun epa Reuel anu jikiaibu jatu yukakin:

—¿Jaskakin jawaida man jatu amatanai?— jatu wa bestichaitun kemakin yuikin:

¹⁹—Chaxuwan uinika betsabu nemaxun Egipto nawan nuku medabewaxuki. Ja bestimadan, unpax beatantankin min chaxuwan nuku amaxunxuki— aka

²⁰ jawen bakebu yukakin:

—¿Jania ja juni pepadana? ¿Jaskakin ja besti man bashibidanxumen? Ja juni pepa itankanwen, jau ebetan piyununan— jatu wa ana buxun ²¹ja juni iweabu beya wakin Reuel inun jawenabu Moisin jatu bechipai jatube jiwekunkainaya chipu ainwanmakin Reuelin jawen ainbu bake Séfora bimaken ²²januxun juni bake bima kaian jawen bake kenakin Moisin yuikin: “Juni betsan mai pakea anu nawa keskai en jiwekunkainaiwen taexun jawen kena Guersón en waii”, jatu wa

²³ chipu badi ichapa kaken Egipto nawa xanen ibu ma mawaken Egipto nawabun Moisin enabu Israelin enabu jatu ichakawakubainaibuwen taea juinti nishmajaidai kaxai jau ea medabewanun ika Israelin enabu nuitapai jatun Dios ea akaibu Diosun ninkatan ²⁴jabu nuitapajaida waibu jancha ninkatan jaska jatun xenipabu Abraham inun, Isaac inun, Jacob yubani Diosun ana shinankin ²⁵Israelin enabu nuitapaibu uinkin medabewanun ixun jatu ana jaibuwakin taewabainikiaki.

Moisés Diosun katukin kenanikiaki, na janchadan

3 ¹Jabiatiandi jawen kuka Reuel, jawen kena betsa Jetródan, jawen chaxuwan Moisin basi pimaxunkubaini chajjada kakunkaini janu tsua jiweabuma anu jatu iyui kai janu Diosbe janchati mati keyatapa jawen kena Horeb tenaman Moisés jikiken ²ji maxu jamebi menui jawen jede anua Jehová Diosun jancha bunika Moisésbe janchanun ika butua ji maxu anu chi jedejaidabiai jawa ji menuama metakada ibestiaya bechixun ³Moisin shinankin: “¿Jaskai chi jedejaidabiai menuamamen?

Jaska tsuan uinsmabiaken uintanun”, ika ⁴kai ma kemaya ji maxu menui jede ji ikai medanxun Jehován kenakin:

—Moisiin, Moisiin— aka

Moisin kemakin yuikin:

—En nenuki. Ea yuiwe— aka

⁵Jehová Diosun yuikin:

—Ea dapi chaima juyamawe. En nenuken na mai medibiki. Jaskaken eki mesekin min bichi tae jutsekewe— aka ma jutsekeken

⁶ana yuikin:

—En min xenipabun mekenika yushinki. Abraham inun, Isaac inun, Jacobun ea ninkakubainiwen taexun duawakin en jatu mekekubainiki— akaya Dios uin Moisin datekin jawen mekenen jawen besu achimaken ⁷ana Jehová Diosun xabakabi yuikin:

—Egipto anuxun enabu ichakawaibu xabakabi en jatu uinmis en unaiin. Jatu dayama chakayamaibun jau en jatu medabewanun nuitapai janchawen ea yukaibu en ninkaii. ⁸Egipto nawabun jatun kushipawen jatu tsumawani jatu mebinbainkin ean Egipto mai pakeanua jatu paxawakin iyunun ika ma en butuaki. Jadi ja mai pakea betsa pepa ewapa anu unanuma jiwexanaibu anu piti midima jamen ikai anu en jatu iyuxanaii. Janu Canaán nawabu inun, Hitita nawabu inun, Amorreo nawabu inun, Ferezeo nawabu inun, Heveo nawabu inun, Jebuseo nawabu ikis jiweabu anu jatun mae tibi en jatu mebinma akeakexanaii. ⁹Israelin enabu kaxaibu ma en ninkaki. Jabiaskadi Egipto nawabun jatu ichakawa chakayamaibu ma en uianki. ¹⁰Jaskawen taexun enabu Israelin enabu Egipto anua min jatu kainmaxanun Egipto xanen ibu bena anu en mia nichinkin yunuyuaki— aka

¹¹Moisin Dios kemakin yuikin:

—¿Jaskakain xanen ibu Faraón bena anu kaxun enabu Israelbu en jatu janchaxuntan Egipto anua en jatu kainmai katidumen, en jawaumabiadan?— aka

¹²Jehová Diosun ana kemakin:

—Ibubis min jawaumabiaken mia medabewakin mia putama en mibe ikunkainxanaii. Egipto anua enabu iwei nenu na mati medibi anu min ana juxun minabubetan min ea kenwanyan padanma en mia yunuima min uinxanaii— aka

¹³datekin Moisin ana yuikin:

—Min ea jaska wa Israelin enabu anu kaxun ean jatu yuikin: “Jatun nukun xenipabu mekekin duawapauni Diosun matu anu ea yunushinaki”, en jatu wabia ea yukakin: “¿Jadakidi kenamen?” ea akabu ¿Jadakidi jatu yuixanpa?— aka

¹⁴Diosun ana yuikin:

—Eadan, Enmebi En Jiweadan, En Eaki. Jadi Israelbu min jatu yuitiduki: “Jamebi Jiweatun matu anu ea yunushinaki”, akinan— iwanan,

¹⁵ ana Moisés yuikin:

—Eskakidi jatu yuikinan: “Matun xenipabu Abraham inun, Isaac inun, Jacob jatun jabu mekekin duawapaunidan, Jehová anu ea yunushinaki”, akin jatu yuitanxanwen. Na kena “Jehová” jabias ikunkainxanikiki, en kena jawa betsa maeamadan. Na en kena “Jehová” dasibitun ea shinantidubudan, jenenakamaki— iwanan ¹⁶—En mia jaska wa kaxun Israelin enabu xanen ibubu ichawatan jatu yuikin: “Jehová matun xenipabu Abraham inun, Isaac inun, Jacob mekekin duawapaunitun ea bechitan matukidi shinankin Egipto anuxun matu ichakawa chakayamaibu matu uinmixun ea yuishinaki. ¹⁷Jabiatandi Egipto anuxun matu bika tenemaibu matu medabewakin paxawatan janu Canaán nawabu inun, Hitita nawabu inun, Amorreo nawabu inun, Ferezeo nawabu inun, Heveo nawabu inun, Jebuseo nawabu jiwebaunabu anu iyukin mai pakea pepa anu piti inun nuxuti midimanu Diosun matu iyuxanikiki”, akin jatu ea yuixuntanxanwen. ¹⁸ Min jatu jaska wa mia ninka pewaxankanikiki. Jaskaken Egipto xanen ibu bena anu jatubetan uin kaxun xanen ibu yuikin: “Jehová Hebreobu mekenika Dios taxnikidan nukuki ma nukushinaki. Jaskaken nuku jeneyuwe, xaba dabe inun besti uxakain nukun mekenika Jehová kenwankin chaxuwan ichapa tesenxun kuakin nun benimawayui kaidan”, akin ja xanen ibu jaska ekidi yuixunxanwen. ¹⁹ Min jaska ekidi yuibia Egipto xanen ibun matu ninkatan matu nichianma ixanikiki. Jakia en kushipawen ninkamas en matu mebikinaxanaii. ²⁰ Jawenabu en kushipa jatu uinmakin ichapabu jatu tenankin en jatu betsa betsapawen date date akubaina jatun mae pakeanuxun en jaska waiwen taexun datekin chipu xanen ibu Faraónen matu nemama jenexanikiki. ²¹ Jabiatandi Egipto nawa dasibi en datekin matuki pe shinanmaya meken bestia man mais kama ixanaii. ²² Jakia man kainkainaitianan, matun ainbu tibitun Egipto nawabu matu dapi jiweabu inun jabe jiweabu anua jau jatun dau tibi yukaxanunbunwen, plata mabu inun oro mabudan. Ja dikabi jatun tadi pepa shadabu biankubaunkin keyutan matun juni bakebu inun matun ainbu bakebudi jatun tadi jatu sawemaya jau jaya bununbun jaska wakin Egipto nawabu man jatu nuitapa waxanaii, jatu kupikinan— aka

4 ¹ Moisin Jehová Dios ana yuikin:

—Enabu en jatu yuibia ea ikunwanma ea yuikin: “Nukun mekenika Dios miki nukutan mibe janchamaki”, ea wakin ea yuixankanikiki. ¿Jatu jaska waxanpa?— aka

²—¿Min jawa tsumamen, min meken anudan?— akin Diosun yuka
—Jawen chaxuwan bamati ji en tsumaki— ikaya

³—Peki. Mai anu udenwen— aka ninkatan ji udenkin main tin aka jawaida dami dunu pianantan mesea dakaken Moisés datei kushikainaya
⁴ jakia Jehová Diosun ana yuikin:

—Dateyamawe. Mexunkain jawen jina debu tsumawe— aka ninkatan ikunwankin Moisés mexunkain jawen jina debu tsumaya samama ana dami jiaya

⁵Jehová Diosun ana yuikin:

—Na en mia jaska wamaxudan, min jatu uinmaya chanima en miki nukutan mibe janchaxu mia ikunwanxankanikiki, eadan, en matun xenipabun Dioski, Abraham mekenikadan, Isaac mekenikadan, Jacob mekenikadan— ⁶iwanan, ana yuikin: —Jamen betsadan min meken xuchi anu mistutan metsekewe— aka ninkatan jawen meken xuchi anu mistutan ana metsekeaya jawaida isin betsa mesejaida ma dami badux ui juxupajaida keska jawen meken sananxun uianyan ⁷Jehová Diosun ana yunukin:

—Min meken ana mistutan ana metsekewe— aka ninkatan ana jawen xuchi anu jawen meken mistutan metsekea jawen meken ma dasibi xuxa Moisin uin: —¡Jabaa! Ma en meken kayabixuki, en yuda jidabi xuxa keskaidan— ikaya ⁸Jehová Diosun ana yuikin:

—Min ja dukun jatu dami waxuan danankin mia ikunwanbumaken janua ja ja kachu min dami waya janua mia ikunwantidubumenkain. ⁹Jakia ja dami dabe min jatu axunbia mia jawa ikunwanbumaken ana jatu dami betsa waxunkin Egipton jene anua unpax shumuki bitanxun mai metu anu min jukaya unpaxbia jawaida dami jimixanikiki, ja dami dabe inun besti jau ikunwanunbunan— aka

¹⁰Moisin kemakin:

—¡Min ea peidawawa! Xanen Ibuun, ewen nuiwe. En janchai peismawen taexun en atidumaki. Uatian inun ikis en jabiaskaski. Min tsuma en jana janbismaki, en janchai petidumadan— aka

¹¹Jehová Diosun ana yuikin:

—¿Tsuana yudabu kexaya bawanimen? Jantu wakin juyu wakin pata wakin bekun wankin inun uinmaidan, ¿tsuan amismen? Jakia ean besti en amiski, Jehová Diosunan. ¹²Jadi janchama katanwen. Mia putama en mibe kakin min kexa inun min jana pewakin min janchai en mia pe janchamakubainxanaii, jadi min yuiaikididan— abia

¹³shinankin jeneama jawenchains Moisin ana yuikin:

—Xanen Ibuun, ea yunuama ewen nuiwe. Juni betsa katuxun min jancha bumaxanwen— aka

¹⁴janua Moiséski sinatakin Jehová Diosun ana yuikin:

—Levín baba Aarón min juchidan, jancha pejaidamis en unaiin. Miki nukunun ika ma juikiki. Miki nukui mia uin benima chakayamaxanikiki. ¹⁵Jau mia ja janchaxunun jaska dasibi min jatu yuikatsi ikai min betsa Aarónbetan min jatu yuiaya matu dabe en medabewakubainxanaii, jaska man akai matu unanmakinan. ¹⁶Dios keskakin min Aarón yuiiai min jancha jatun mia yuixunxanikiki, min kexawen min yuiiai keska

wakinan. ¹⁷Na chaxuwan bamati jiwen dami betsa betsa wakin min jatu mesewakin uinmaxanaiwen taexun butanwen— aka
—Peki— itan

Egipto anu Moisés chintunikiaki, na janchadan

¹⁸Jawen kukan chaxuwan mekexuna anua ana chintunkidani jawen kuka Jetrón jiwe anu jikixun yuikin:

—Kukaan, ea ninkawe. Enabu Egipto anu jiwewuabumenkain en uinkatsis ikaii. ¿Ana chintunkaintanxanpa?— aka
Jetrón kemakin yuikin:

—Peki. Uinda unanuma katanxanwen—

¹⁹Madián nawabu anuxundi Jehová Diosun Moisés ana yuikin:
—Jabun mia detenun ika inibudan, ma mawanibuki. Dateama Egipto anu ana katanxanwen— aka

²⁰Januxun jawen ain inun jawen juni bakebu asno kamaki jatu katsauntan Diosun kushipaya jawen ji tsumabaini Egiptokidi Moisés kai taeya ²¹chipu Jehová Diosun Moisés ana yuikin:

—Egipto anu min ma jikia jatu dateti dami en mia amashina keska jakimama na jabias dami ana akin Egipto xanen ibu Faraón uinmaxanwen. Min jaska waxunbia jawen juinti kushi wakin ninkaisma en waken Egipto anua Israelin enabu jawaida Faraónen jatu nichinkin jeneama ikunkainxanikiki. ²²Jaska wakin Faraónen jatu nemaya Faraón ea yuixunkin:

—Jehová Jamebi Jiwemistun mia ea yuimaikiki. Ninkawe. Israelin enabu en juni bake iyua keskabuki, en bechipajaidaidan, akin ea yuixunxanwen. ²³Israelbu buxun jau ea kenwantanunbun min jatu nemashinaki. Min jatu nemakubainmiswen taexun min juni bake iyua min bechipajaidadan, en tenanxanaii— akin —Na jabias jancha Faraón min betsa Aarón ea yuimaxunxanwen— aka

²⁴Abraham jiwekunkaunaitian jawada Diosun Abraham yununi shinanma jawen juni bake iyuatun jina kubichi Moisin mexteama iyamaken Egiptokidi bai kawen bui janu uxaibu anu jaki nukuxun kupikin Jehován Moisés tenanpanan ²⁵⁻²⁶jawaida jawen ain Séforan jaska Moisin kaneni unantan jaki sinatakauan mishki nupe kenu bixun jawen bake iyuatun jina kubichi mextexun Moisin tapu takin yuikin: “Min nukun baken jimiwen taea min ana mawama min en bene jiweyuiai”, aka jawen baken jina kubichi Séforan ma mexteawen taea Jehová Dios jaki sinatai daetan Moisés kupiama inikiaki. Ma uxe betsa binukainaya

²⁷bebunkidi Jehová Diosun Moisin betsa Aarón yuikin: “Janu tsua jiweabumanu min betsa Moiséski nukui kawé”, aka Aarónen ninkatan chajaida jaki nukui kai janu Diosbe nukuti mati anu Moiséski nukutushia badi ichapa uinsma benimajaidakin yukakin tantsu aka ²⁸Jamebi

Jehová Diosun Moisés yuikin yunushina jancha inun jawen jatu dateti dami axanaikidi Moisin Aarón yui jaki dasibi chani keyua ninkatan ²⁹jaskabaini bui jikishinxun Moisés inun Aarón kaxun Israelin enabu xanen ibubu ichawaxun ³⁰jaska Jehová Diosun Moisés yuima jawen jancha dasibi Aarónen jatu yuixunkin inun jawen jatu e imati dami axanwen, iwanan, yunuima ibubis Moisin ja dami jatu axunkin jatu uinmaya

³¹ja dami jatu jaska waxuna jawenabun uin chanima ikunwankin Egipto nawabun jatu ichakawamisbu Jehová Diosun uinmis unantan Israelin enabu danti itan beti ixun Jehová Dios kenwanibukiaki.

Moisés inun Aarón Faraónbe janchanibukiaki, na janchadan

5 ¹Xaba betsatian Egipto xanen ibu Faraón anu Moisés inun Aarón kai jikixun Aarónen Moisin jancha yuixunkin:

—Israelin enabu mekenika Jehová Diosun jancha mia yuinun ea ninkawe: “Jadi tsua jiweabuma anuxun jau enabun en pepa shinain besi nawatanunbun jatu nemakin bashiyamaxanwen”, akin, mia yuikiki— aka

²jatun jancha ninkabiakin jawa jatu tapinkatsis ikama Faraónen jatu yuikin:

—¿Matun mekenika Jehová tsuamen? ja ninkatan ean Israelin enabu en nichinunan. Ja matun mekenika en unanma inun matunabu besi buaibu en jatu nichianmajaidaki— jatu wa

³Moisés jawen betsa Aarónbetan Faraón ana yuikin:

—Hebreo nawabun mekenika Diosun nuku yuimaki. Jaskawen taea nukun mekenika Jehová kenwanun ika jadi tsua jiweabuma anua xaba dabe inun besti bui janu jikitan kenwankin chaxuwan ichapa tesenxun nun kuaxanaii. Nun jaska wakin kenwanmaken nuku kupikin tenantiduki, isin paepa tenemaimenkain, nukuki sinataibun nupewen nuku detetidubumenkain— aka

⁴jakia jatun jancha ninkakatsi ikama jatuki sinatakin Egipto xanen ibun jatu kunyan akin:

—Moisés inun Aaróneen, ¿jaskakin matunabu dayabiaibun jatu itimaska wakin man jatun daya jenemanun ikai ikai? Nenuxun ea jaska yuiama dayaditankanwen— iwanan,

⁵ana jatu yuikin:

—Matunabu midimabun ea daya chakayamaxunbiaibun ¿jaskakin man jatun daya jenemabainun ika ikai? Budikanwen— jatu watan

⁶jabias xabatian xanen ibujaida Faraónen jawen yununikabu betsabu Egipto nawa inun betsabu Hebreo nawa jabun jatu dayamakin tananikabu jatu ichawatan yuikin:

⁷—Israelin enabun ja jiwe wati mai jusikin kapanmisbu basi tsusin man jatu pewaxuna amisbudan, ana jatu inanyamakanwen, natian jau ibubis

basi tsusian ichawatan akubainunbunan. ⁸Man jatu inanmabia xaba tibi jati kainmakubainmisbu jatu jenemama ana jabiatidi jatu amakubainkanwen, betsa maewamadan. Natian chikishkin ea ea akin: “¿Nukun mekenika Dios kenwain kaxanpa?” akin ea yukakanikiki. ⁹Ja junibudan, ana jatu dayama chakayamakubainkanwen, daya jenei bexpakidan Moisés inun Aarónen chani jancha jau ana ninkayamakubainunbunan— jatu wa

¹⁰Janua Egipto nawa yununikabu inun Israelin enabun jatu dayamakin tananikabu mae betsa betsapa anu buxun Israelin enabu jatu yuikin:

—Faraónen nuku yunuxudan, matu yuinin ea ninkakanwen. “Basi tsusin chunkish nun ana matu inanmakiaki. ¹¹Egipto nawabun basi matu ana pewaxunabumakiaki. Natian janiada ibubis bechitan basi tsusin chunkish bitan bitankin mai basi kapankin pewatan jati man tsusin wanmis keska jawa jeneyamakanwen”, akin nukun xanen ibujaidatun matu yunuikiki. Jaskakiaki. Akubainkanwen— jatu akeakeaibun

¹²Jaskaken Egipto mai pakea jidabi anu basi tsusin chunkish ichawakin keyuxun bebidan bebidanaibun ¹³Egipto nawa yununikabun jatu yunuchakayamakin jeneama:

—Xaba tibi jati nun matu yunua man amisti wadiakin jeneama akubainkanwen, basi tsusin chunkish nun matu inan man akubainmis keska wakinan— akin jatu kushabetana yunukubainaibun ¹⁴jati amisbuti jayamaken Egipto nawa yununikabun Hebreo nawa jabun jatu dayamakin tanamisbu yukakin:

—¿Jaskakin uatian man akubainshina keska ma ana akamamen, uatian inun ikisdan?— akin jatu kusha kusha akabu

¹⁵Jaska jatu wabu Hebreobun jatun daya tanamisbu dasibi Faraón anu buxun kaxai keskakin Faraón yuikin:

—Xanen ibujaidatuun, ¿jaskakin min dayadubu min nuku bika tenemai? ¹⁶Min yununikabun basi tsusin chunkish nuku ana inanmabia jaska watan nun anun keska nuku yunuchakayamakin: “Menan, jawaidakanwen”, akin nuku kushakanikiki. Min yununikabun nuku kanemakin chakabuwamakanikiki, basi nuku ana inanmadan— akabu

¹⁷Jatun jancha danankin Faraónen jatu yuikin:

—Daya ichapa man jayabia jawawen jaskatima chikishi maputanun ika bexun ea yukakin: “¿Nukun mekenika Jehová kenwantanpa?” ikin man ea yukabidanbidanaii. ¹⁸Matunabu dayamaditankanwen. Tsuan matu basi tsusin chunkish ana inanmabia man uatian akubainshina keskadi jabiatidi xaba tibi jatu amakubaintankanwen— jatu wa

¹⁹Hebreobu jabun jawenabu dayamamisbun jatu jawa betsa waxuanma shinain:

—¡Nun peidawa! Xaba tibi jatixun nun daya midintiduma nuku nuitapawaikiki— itan ²⁰Faraónen besuudia taxnibaini Moisés inun Aarónen jatu manai anu jatuki nukutan ²¹jatuki sinatakin jabun yuikin:

—Nuku bika tenemakin jau nuku tenanxanunbun jawenabu Faraón nukukidi chakabu shinanmakin man jatu nukuki sinatamaii. Man jaska waiwen taexun Jehován matu unanti watan jau matu kupixanunwen— jatu watan taxnibainaibun

Moisés Jehová Diosbe janchakin yukanikiaki, na janchadan

²² Juinti nishmajaidatan Moisin Jehová Dios yuikin:

—Jehováan, ¿jaskakin na Israelin enabu min jatu nuitapajaidawai? ¿Ea jaska wakatsi min ea nenu yunuimamen? ²³ Min yunua kushipawen juxun en Faraón min kena en jaki chanibiashinken minabu Faraónen jawenabubetan ana jatu ichakawa chakayamaikiki. Min jawa jatu mekei nuiamaki— aka

6 ¹ Jehován kemakin yuikin:

—Chanima jabiaslaki. Natian Faraón en kupiai min uinxanii. Matu nichinkatsi ikama matu yaushibiai en kushipawen taexun jawenabu anua ibubis Faraónen matu ana nemama nichinxanikiki, man kainbainunbunan— iwanan,

Diosun Moisés ana janchawanikiaki, na janchadan

² Moisin jau jawenabu yuinun Diosun ana Moisés yuikin:

—Eadan, en matun xanen ibu Jehováki. ³ Ea mekenika dasibibu binuatun matun xenipabu Abraham inun, Isaac inun, Jacob ean en jatu unanmakubainiki. Jakia en kena chanima kayabi xanen ibu Jehová en jatu unanmama iniki. ⁴ Jabu en jatube yubakanidan, Canaán mai pakeanu nawa keskai jiwekubaunpaunibu anu ja mai jidabi jawenabubetan jau ibuwaxanunbun en jatube yubakaniki. ⁵ Natian en jatu ninkaidan, Egipto nawabun jatunabu tsumawanixun jatu dayamakin nuitapawa chakayamaibuwen taea jaska jatun xenipabube en yubakani ma en ana jatukidi shinaiin. ⁶⁻⁸ Jaskaken minabu ea jatu yuixunwen: “Eadan, emebi en jiwea en kenadan, Jehováki. Egipto nawabun minabu dayamakin jau jatu ana tsumawayamaxanunbun jatu mexpamatan jatun mai pakeanu min jabu paxawaxanii. En kushipa xabakabi dasibibu jatu uinmakin Egipto nawabu kupitan en matu iyuxanii. Jaska watan enabus en matu waxanii. Matun mekenika Jehová en ikunkainxanii. Egipto nawabun matu dayama chakayamakin matu bika tenemaibu matun mekenika Jehován en matu iyuni matu inun matun bakebu inun matun bababun unankin shinankubainxankanikiki, ea jakimamadan. Mai betsa ukedia Abraham inun, Isaac inun, Jacob ja mai pakea en jatu yubaniwen taexun ja matu yunukin en matu ibu wamaxanii. Eadan, en matun xanen ibu Jehováki, ean en matu jancha waidan. Ea ninkakanwen”— jatu wa

⁹ jabias jancha Israelin enabu Moisin jatu yuibia Egipto nawabun jatu dayama chakayamaiwen taea juinti nishma punu nukajaidakin Moisin

jancha danankin ana ninkakatsi ikabumaken ¹⁰ Jehová Diosun Moisés ana yuikin:

¹¹—Egipto anua Israelin enabu kainbainibu Faraónen jau jatu bashiyamaxanun ana uinkin yuitanwen— aka

¹² jakia Moisin kemakin yuikin:

—Uian, Jehováan, min jancha en jatu yusian Israelin enabu ea jawa ninkabumajaidaki. Enabun ea ninkabumawen taexun ¿jaska watan Faraónen en jancha ninkatidumen? Eadan, xabakabi janchai en peismabia en jaska yuitidumaki— aka

¹³ ana nemakin Jehován Moisés inun Aarón yunujaidakin:

—Nenu Egipto anua enabu Israelin enabu jau paxanunbun man jatu iyuxanun en matu yunuaii. Na jabias jancha en matu yuixu matunabu inun Faraón banabimatankanwen— jatu wanikiaki.

Moisés inun Aarón Diosun katunikiaki, na janchadan

²⁸ Ana xaba betsatian Egipto mai pakeanua Jehová Dios Moisésbe janchakin ²⁹ ana yuikin:

—Eadan, en matun xanen ibu Jehováki. Jancha dasibi en mia yuixanai Egipto xanen ibu Faraón ea yuixunkubainxanwen— aka ³⁰ Moisin Dios ana kemakin:

—Xanen ibu keska jancha pewen en janchatidumaki. ¿Jaskatan Faraónen en jancha ea ninka pewatan ea axunxanimenkain?— aka

7 ¹ januxun Jehován Moisés ana yuikin:

—Uian. Jau Faraónen mia ninkakubainun ea keska wakin en mia jeneaii, jau en yunuti kushipawen min betsa Aarón jau mia janchaxunkunkainxanunan. ² Dasibi en mia yunua, januxun min betsa min yuia, jatundi Faraón mia yuixunkubainxanikiki, jau jawen mai pakea Egipto anua Israelin enabu dasibi paxai buaibu jau jatu nichinxanunan. ³ Jakia jawen juinti kushi wakin ninkaisma watan en kushipa jawen unanmati dami betsa betsapa inun jawen e imati ichapa shadabu en matu amaxanaii, Egipto mai pakea jidabi anuxunan. ⁴ Matun jancha Faraónen ninkama dananyan janu en kushipajaida en jatu uinmakin dasibibu unanmakin Egipto nawabun jatu ichakawakubainmisbu Israelin enabu xanen ibu tibi jawenabube nenua en jatu iyuxanaii. ⁵ En kushipawen Egipto nawabu kupitan jatu anua Israelin enabu en jatu taxnimabainai ean en matu jaska wabainai Egipto nawabun ea en matun xanen ibu Jehová ea unanxankanikiki— akin Jehován Moisés yuia

⁶ Moisin ninkatan jaska Jehován dasibi yunushina Moisés inun Aarónen axunkubainibukiaki. ⁷ Moisés 80 badiya inun jawen betsa Aarón 83 badiya Faraón anu kaxun Jehová Dios janchaxunibukiaki.

Aarónen mestentikidikiaki, na janchadan

⁸Faraón anu budiabuma Jehován Moisés inun Aarón yuikin:

⁹—En jancha man yuia Faraónen matu yuikin: “¿Man ea padain ikimenkain? Matun kushipa ea uinmakin jawada dami ea waxunkanwen”, matu waya, Faraón tsaua bebunxun jau jawen mestenti Aarónen putaxunun Aarón yunuxanwen, jau dami dunununan— jatu wa

¹⁰Moisés inun Aarón Faraón anu buxun jaska Jehován yunushina keska wakin Faraón inun jawen medabewanika xanen ibubu bebunxun jawen mestenti Aarónen puta dami dunua dakaken ¹¹Faraón dateama jawen unanepabu inun jawen mukayabu jatu kena bexun jatun yushin kushipawen jabiaskadi jatuna akin ¹²bestibu tibitun jawen mestentidi putabu dami dunua maniabun jakia Aarónen mestenti dami dunuatun jatun mestenti dami dunuabu ja Aarónenatun jatu xeankin keyuan ¹³jaska Faraón axunbiabu uinbiatan jawa dateama juinti kushitan jaska Jehová Diosun yuishina keska Moisés inun Aarón Faraónen jatu ninkatan jawenabu jenexunama inikiaki.

Jene dami wakin jimi wakin keyunikiaki, na janchadan

¹⁴Januxun chipu Jehován Moisés yuikin:

—Minabu bupananbun Faraón juinti kushichakayamatan jatu bashikiki.

¹⁵Jaskaken meshukidi penamajaida Aarónbe jene kexa anu kakin ja mestenti dunu damishina tsuma kaxun janu Faraón butuai anuxun manaxankanwen. ¹⁶Man jadi ka jaki nukutan Faraón ea yuixunkin:

—Hebreobu mekenika Jehová Diosun mianu ea yunuxuki. Mia yuikin: “Janu tsua jiweabuma anuxun enabun ea kenwain jau bununbun ana jatu nemayamawe.” En mia yuibia min ea ninkadiamaki. ¹⁷Min jaska waiwen taexun Jehován yuikin: Na jabiastian en xanen ibu Jehová min ea tapiain, mia waikiki. Jaska jakidi min unanmaken ea yunuxu min uinun na mestentinin en jene bekusha dasibi jene jimi keyuikiki. ¹⁸En jaska waya baka dasibi mawai keyukanikiki. Jene pisi mayaya mesekin janua ja unpax akabuma dananxankanikiki— akin

¹⁹jawen betsan jaska waxanai Moisés besti Jehován yuikin:

—Aarónan, eska wamaxanwen. Jawen mestenti bitan Egipto mai pakea jidabi jene anu jau jimi daminunbun jawen mestenti tsumatan jene dasibi bemaki sananbaunwen. Jatun jenewan inun, jatun ian dasibi inun, jene beshudu ikai anu inun, unpax janua biti mai pukinkin kini wanibu inun, jatun unpax jaki manemisbu dasibi anu inun, janida Egipto nawabu jiwebaunabu anu jimi wamaxanwen, jatun ji kenchu inun jatun mishki shumu anudidan, akin Aarón amaxanwen— aka

²⁰Jhován yunua kaxun jau jaska wanun Moisin Aarón ama jawen medabewanika xanen ibububetan Faraónen uianyan Aarónen jawen

mestenti binikin sanantan jatun jenewan bekusha jene dasibi dami jimi keyuaya ²¹ baka mawai keyui jene napismayaya chakabuken Egipto nawabun danankin atidubuma janu jiwebaunabu anu jene dasibi dami jimi keyunikiaki.

²² Jakia jatun yushin kushipawen Egipto nawa mukayabun jabiaskadi wakin jabun unpax dami wakin jimi wadiaken jaska uinbiatan Faraón juinti kushitan jaska Jehován Aarón inun Moisin ma jatu yuixu keska ikaya ²³ janua jaska uinbiayu jawa jawen nuiama Faraón jawen jiwe ewapa jawendua anu chintunkaini mapekeken ²⁴ jene anu unpax bixun atidubumawen taea unpax bexna janua biti jene kexa anu dasibitun pukinbainabun

Jeu dami atimapa wanikiaki, na janchadan

²⁵ jaska Jehován Moisés inun Aarón jatu jene bekushmakin ichakawamashina 7 xaba binukainaya

8 ¹ Januxun Jehován Moisés ana yuikin:
—Faraón anu ana kaxun ea yuixuntanwen: “Jehová Diosun mia yuiái ninkawe. Enabun jau ea kenwain butanunbun jatu ana nemayamawe. ² Jakia ninkamas min ea jatu nemakanyan jawen taexun mia kupikin min mai jidabi anu jeu midimawen mia inun minabu en jatu anu taxnimaxanaii. ³ Min jenewan anua jene kukatsa ikasi jeu midima kain chube ibidan min jiwe ewapa jawendua medan ishchubainbaini jiki keyui min dintu medan matai, min uxati medan matai, inun min medabewanika xanen ibubun jiwe medandi ishchubainbaini matai inun, minabun januxun misi wamisbu anudi matai inun, matun misi wati ji kenchá medandi matai tsami keyubaunxankanikiki. ⁴ Miki inun min medabewanika xanen ibubuki inun minabu dasibiki tsaminbaunkin matu bika tenemaxankanikiki”, akin jabias jancha Faraón ea yuixuntanwen— aka

⁵ kaxun jabias jancha Faraón yuibiabu ana jatu ninkamajaidaken januxun Jehován Moisés ana yuikin:

—Min betsa Aarón amadiwe, jau jatun jene inun, jatun paxku debu dasibi inun, jatun ianenwan dasibi bemaki jau jawen mestenti sananbaunkin janida Egipto nawabu jiwebaunabu anu jau jeu midimajaida ishchubidan jau dasibi jatu medan matai keyununbun dami wamadiwe— aka

⁶ Jehován jancha Moisin Aarón ma yuiken jatun jene dasibi bemaki jawen mestenti Aarónen tsumaxun sananbaunaya jene dasibi anua jeu midimajaida kainbidani bekin Egipto nawabu jiwebaunabu anu matai keyuaibun ⁷ januxun jabiaskadi wakin Egipto nawa mukayabun jatun yushinen kushipawen jeu jene medanua jau taxninunbun dami wadiakin Egipto mai pakeanu jeu pa wadiaibun ⁸ jaska wabu jeu midimajaidatun

jatu bika tenemaibun Moisés inun Aarón jatu yuima beabu Faraónen jatu yuikin:

—Ea inun enabu anua jeun nuku bika tenemai jau nuku nemaxunun matun mekenika Jehová ea yukaxunkanwen. Jehován ea jaska waxunaya minabun matun mekenika yushin kenwain buaibu en ana jatu niti akamaki— aka

⁹ninkatan Moisin Faraón kemakin:

—¿Jawatian mia yukaxunpa, min jiwe jawendua anua inun, min medabewanika xanen ibubun jiwe anua inun, minabun jiwe anuadan, jau butubaintanun ea yuiwe, jau jeu jene kexa besti bashikununbunan?— aka

¹⁰Faraónen kemakin:

—Jabia meshukidi ea axunwen— jatu wa Moisin yuikin:

—Peki. En mia axuin kaii. Nukun mekenika Jehová tsua keska jayama min uinxanaii. ¹¹Min jiwe jawendua ewapanua inun, minabu anua meshukidi jeu butubain jene kexa besti jiwexankanikiki, ana minabube mia bika tenemamadan— aka

¹²Faraónen jiwe anua Moisés inun Aarón kainkaini kaxun jeu midimajaida Jehován yunushina jau jatu nemakin bextexunun Jehová Moisin yukaxuna ¹³jaska yukai keska Jehován axunkin jeu dasibi tenan keyukin jiwe tibi medanua inun, jemaintin tibi anua inun, bai tibi anua jeu mawai keyua ¹⁴Egipto mai pakea anu manibaunabun jeu ichawakin janus manchin keyuabu janua jeu chapui pisimayaya ¹⁵jakia Jehován jeu yamawaxuna ana jawen dateama jawen juinti kushitan Moisés inun Aarónen jancha Faraónen ana jatu ninkama jaska Jehován Moisés yuishina keskakin Faraónen Israelin enabu ana jatu nemaniki.

Shiu dami wakin pawanikiaki, na janchadan

¹⁶Januxun Jehován Moisés ana yuikin:

—Egipto nawabun mae tibi anu mai mishpu dami jau shiunun Aarónen jau jawen mestenti sanantan mai bekushnun yunuwe— aka

¹⁷jabias Jehován jancha Moisin Aarón yunukin ama jawen mestenti sanantan mai mishpu Aarónen bekushaya janua Egipto nawabu jiwebaunabu anuadi mai mishpu dasibi dami shiutan yudabu dasibiki inun inabukidi nidi ikin jatu tsan tsanki akin jatu pikin jatu bika waya ¹⁸Egipto nawa mukayabundi jatun yushinen kushipawen jabiaskadi wanun ixun apaiabu ikamaken ja shiu damiatun jatu pikin yudabu inun inabu yumanwainbun ¹⁹janua mukayabu buxun jatun xanen ibujaida Faraón yuikin:

—Na shiu dami wakinan, jatun Jehová Dios dasibi binuatun besti jatu dami wamaxuki— akabu jaska ninkabiatan ana jawen juinti kushitan jatun jancha Faraónen ninkama jaska Jehován bebunkidi yuishina keskaya

Chupe dami wakin pawanikiaki, na janchadan

²⁰Januxun Jehován Moisés ana jancha wakin:

—Meshukidi Faraón penama jene kexa butuikiki. Mia dukun penamajaida butukain jaki nukuxun eska Faraón yuixanwen: “Nukun mekenika Jehová Diosun eska mia yuikiki. Ninkawe: Enabun jau ea kenwain bununbun jatu ana bashikin niti ayamawe. ²¹En jancha ninkama enabu min ana bashiaya miki inun, min tsumabuki inun, minabuki chupe midimajaida en yunuxanaii. Min jiwe inun, minabun jiwe inun, min mai jidabi anu chupe midimajaida en yunua xuku dakai buspu tsaubaunxankanikiki, main dikabidan. ²²Na Egipto anu en jaska waitianan, enabu Israelin enabu Gosen anu jiwebaunabu medan en jatu yunuama jawa chupe betsa taska en yunuama ixanaii. En jaska waya min ea uinkin en Jamebi Jiwemis Jehová eadan, na mae anu en nia min unanxanaii. ²³Minabu inun enabu anua mia uinmakin betsajaidawaxunkin jawen matu dateti dami meshukidi en mia waxunxanaii”, akin jabias jancha en mia yuii Faraón ea yuixunxanwen— aka

²⁴uxashini penaya kaxun Faraón jabias jancha Moisin yuibia ana ninkamajaidaken chupe midimajaida nai kuin meshubidanai keska wakin Jehován yunuaya Faraónen jiwe anu inun jawenabun jiwe tibi anu chupe midimajaida nidi ibidan jatu pikubainkin jeneama Egipto mai jidabi jawa tukan wanma chupewan mataxun jatu chakabuwaya ²⁵Januxun Faraónen jawen tsumabun Aarón inun Moisés jatu yuima jawaida yuitan iwexunabu Faraónen Moisés inun Aarón yuikin:

—Peki. Matun mekenika Dios kenwankin matun inabu tesenxun menu keyuditankanwen. Jakia nukun mai anua taxniama janubixun akanwen— jatu wa

²⁶Moisin kemakin yuikin:

—Janubixun nun jaska waidan, pemaki. Nukun inabu tesenxun menukin keyukin nukun mekenika Jehová Dios nun kenwanyan minabun ja inabu kenwankin medibi wamisbun jaska bechipaiama nuku uin nukuki sinatajaidakin mishki inun mankan tunkuwen nuku tsaka tsaka akin tenantidubuki. ²⁷Jaskawen taea janu tsua jiweabuma anu xaba dabe inun besti enabuya kaxun jadixun nukun inabu tesenxun menukin keyukin nukun mekenika Jehová kenwain jaska nuku yunushina keska axunun ika nun kakatsis ikaii— aka

²⁸Faraónen Moisés ana yuikin:

—Peki. En matu nichinyuaii. Janu tsua jiweabumanu jatixuinda kama matun mekenika Jehová Dios kenwankin buxun ea dikabi man ea yukaxuntanunbunan— jatu wa

²⁹Moisin ana yuikin:

—Uian. Meshukidi mianua min medabewanika xanen ibubu anua inun, minabu jidabi anua chupe bui jau ana jayayamanun mia anua kaxun jaska Jehová en mia yukaxunaii. En jancha jawen jenea ninkawe. Nukun mekenika yushin Jehová kenwain enabu buaibu jatu nemakin ana nuku padanyamawe— atan ³⁰Faraón anua kainkaini kaxun Jehová Moisin yukaxuna ³¹jaska Moisin yukaxuna ninkatan Faraón anua inun jawen medabewanika xanen ibubu anua inun jawenabu dasibi anua Jehován chupe dasibi jatu kainmakin keyuxunbia ana chupe jayama ³²Faraónen uin ana jawen juinti kushitan Israelin enabu kenwain bupananbun ana nemakin jatu bashinikiaki.

Inabu tenankin Jehován jawen kushipa jatu uinmanikiaki, na janchadan

9 ¹Faraónen jatu jaska washinawen taexun Jehován Moisés ana yuikin:

—Faraón anu ana kaxun ea yuixunkin: “Hebreobun mekenika Jehová Diosun eska mia yuikiki. Ninkawe: Jau ea kenwain bununbun enabu ana jatu bashiyamaxanwen. ²Jakia bashikin min jatu nemakubainaya ³en kushipawen matun inabu dasibi ea Jehován jatu isin paepa inan basi anu mapua matun caballo inun, matun asno, inun matun camello, inun matun ina awa inun, matun chaxuwan isin betsa paepawen mawaxankanikiki. ⁴Jakia Israelin inabu inun Egipto nawabun inabu betsajaida wakin en mia uinmaxanaii. Israelin enabun inabu jawa betsa en tenanma ixanaii.

⁵Na eska en mia yuiaidan, besti wakin en mia manayuaii. Meshukidi Jehován en axanaii”, akin na jabias jancha Faraón ea yuixunwen— aka

⁶ninkatan Faraón anu Moisés kaxun Jehován jancha yuibia Faraónen ana ninkamaken jaska yuishina keska wakin penaya Jehován jatu chamijaida waya basi xukua tibi anua Egipto nawabun inabu dasibi mawai keyuaibun jakia Israelin inabu jawa betsa mawabumaken ⁷jaska uintan Israelin enabu jiwebaunabu anu jawen tsumabun jau uinbauntanunbun Faraónen jatu yunua Israelin inabu uin buxun jatun inabu jawa betsataska mawamaken uinkubauntanxun chintunbidan jaska Faraón yuiabu sinatai juinti kushitan Faraónen ana jatu bashikin niti akaya

Chami atimapa wakin jatu pa waxunikiaki, na janchadan

⁸janua Jehován Moisés inun Aarón ana yuikin:

—Chi ketinmisbu anua mapu mespuxun butankanwen. Bukin Faraónki nukutan ja bebunxun Moisiin, mian besti ja mapu manaundi putakin sa sa axanwen. ⁹Ja chi mapu damibaini kudumayabaini pabainkin jatun mai pakea jidabi anu Egipto nawabu dasibi inun jatun inabu jabu tenan meama ishianki, jatuki tsamia akeakekin jatu chami inan tenei su itan pe iake iakekin tenexankanikiki— jatu wa

¹⁰buxun chi ketinmisbu anua mapu mesputan Faraón uinmanun ixun mapu buxun Faraón bebunxun manaundi chi mapu putakin Moisin sa sa akin keyuaya jatun mai jidabi anu Egipto nawabu dasibi inun jatun inabuki tsami keyuabu ¹¹jatunabube chami isin tenei nuitapakin Egipto nawa mukayabun Moisin axu keska ana anun ika kai taxniabumaken ¹²Jehován Faraón jawen juinti kushi waya Faraón sinaxun jawen juinti kushiwen taexun Moisés inun Aarónen jancha jatu ninkamajaida jaska Jehován Moisés yuishina keskaya

Badux ui atimapa wakin dami wanikiaki, na janchadan

¹³januxun Jehován ana Moisés yuikin:

—Penamajaida butukaini kaxun Faraón bebun nixun ea yuixunkin: “Hebreobun mekenika yushin Jehová Diosun eska mia yuikiki. Ninkawe. Enabun ea kenwain buaibu ana jatu bashiyamaxanwen. ¹⁴Min ana jatu bashiaya na jabiatandi dasibi jawen kupiti mia anu inun, min medabewanika xanen ibubu anu inun, minabu dasibi anu en yunuaiwen taexun mai jidabi anu yushin kushipajaida tsua ea keska betsa jayama min unanxanaii. ¹⁵En kushipa jatu uinmakin chami paewen mia inun minabu en kupiaya man mawakeanshinabuki. ¹⁶Jakia mai jidabi anuxun en kushipa inun en kena jau unanbaunxanunbun en kushipa mia uinmakin en mia tenanma ishianki. ¹⁷Jaska en mia uinmabiakubaina min shinan betsa watan enabun ea kenwain bupananbun min jatu bashikubainaii. ¹⁸Jaskakenan, eskatian ea ninkawe. Meshukidi na jabiatandi badux ui midima kushipajaida en nidi axanaii, jaska min xenipabu Egipto anuxun bai taenitian badux ui jaska ikunkidanama wakinan. ¹⁹Jaskaken matun inabu mawama ishianbu inun matun bai anu dayaibu jiwe medan jau jiki keyununbun minabu jatu yunuwe. Yudabu dasibi inun inabu dasibi jiwetan jikiabuma xabakan mapuabu badux ui kushipa nidi ikin jatu dasibi tenan keyuxanikiki”, akin na jabias jancha Faraón ea yuixuntanwen— aka Moisin ninkabaini kaxun Jehován jancha dasibi Faraón bebunkidi yuibia Moisin jancha ninkamajaidaken

²⁰jaska Jehován jancha Faraónen medabewanika xanen ibu betsa betsapabun ninkatan datekin jatun dayadu inun jatun inabu jiwe medan jau bichinunbun jatun tsumabu jawaida jatu yunuabu ²¹janua jatiditun Jehován jancha ninkabiatan danankin jatun xanen ibu Faraónbetan ninkabuma jatun dayadubu inun jatun inabu bai anua beama jenebidanabu ²²meshukidi penaya Jehován Moisés ana yuikin:

—Egipto mai jidabi anu yudabu inun jatun inabu inun jatun bai anu miban shadabuki badux ui jau nidi inun min meken naiudi sananwen— aka

²³naiudi jawen meken Moisin sananyan kanatun ichakayamai badux ui jusia yunukin Jehován badux ui midimajaida main nidi imaya

²⁴Egipto nawabu xanen ibui taeaitian badux ui midima ja keska uianma ikubidanibu inun ana ikama ipakexanai kana bakakin inun badux ui midima kushipajaida nidi akin ²⁵Egipto mai jidabi anuxun yudabu inun inabu ja bichiabuma inun bai anu miban shadabu detekin tenan keyukin ji tibi jawen punyan tekekin keyuaya ²⁶Egipto anu jatu jaska wakin Gosen mai anu janu Israelin enabu jiwebaunabu anu jawa betsatsaka badux ui nidi ikamaken

²⁷Janua Moisés inun Aarón jau jatu itanunbun Faraónen jatu yunua ixuntanabu Moisés inun Aarón Faraónen yuikin:

—Kanekin jawen jancha en ninkama ikunkainai matun mekenika Jehová pepajaidaki. Jakia ea inun enabu nun chakabukunkainmiski.

²⁸Kana tin ichakayamai inun badux ui midimajaida nidi ikaiwen taexun shinan betsa watan minabu en ana jatu bashiama ixanaii. Jaskaken badux ui jau nesenu Jehová nuku yukaxunkanwen. Jehová man kenwain bununbun en matu nichinxanaii— jatu wa

²⁹Moisin yuikin:

—Jehová xanen ibui mai jidabi jawenasdan, min unanun min mae ewapa anua kainkaini kaxun Jehová naiudia en meken sananxun en mia yukaxunaya kana tin ikainkaini nesei badux ui main ana nidi ikamaki.

³⁰⁻³³Jaskabiaya mia inun min medabewanika xanen ibubu Jehová Dioski man mesediaman en unaiin— atan Faraón anua Moisés kainkaini kaxun jawen meken Jehováudi sananxun yukaxunaya kana tin ikainkaini inun badux ui inun ui kayabi jawaida nesei keyunikiaki. Jatun tadi wati lino bana juaya inun jatun xekiwan betsa cebada ma bimiyaya badux ui kauankin teke teke akin yamawaxu inun jakia ja jukundiama xekiwan inun xekiwan betsa cebada badux ui ikin ja tekeama ixu Faraónen unantan ³⁴ui inun badux ui inun tin ikainkaini nesei uintan Faraón inun jawen medabewanika xanen ibubu dikabi jatube juinti kushitan ana chakabu shinankin ³⁵sina jawen juinti kushixun Israelin enabun Jehová kenwain bupananbun Faraónen ana jatu nichianma bashinikiaki, jaska Jehován bebunkidi Moisés yuima keskaidan.

Shini atimapa dami wakin pawanikiaki, na janchadan

10 ¹⁻²Chipu Jehován Moisés ana yuikin:

—Jamebi jiwemis en ea Jehovádan, man ekidi shinankubainxanunbun jawen jatu datekin e imati dami betsa betsapa en kushipawen jatun mai pakeanuxun Egipto nawabu en jatu mesewani matun bakebu inun matunabu pajaidakubainaibu uinixun man jatu yuipakekubainxanunbun na jawen jatu datekin dami betsa betsapa wakin Faraón juinti kushi wakin jawen medabewanika xanen ibubu en jatu juinti kushi wadiashinaki. Jaskawen taea ana Faraón anu buxun eska ea yuixuntanwen— aka

³ Moisés inun Aarón Faraón anu buxun Jehován jancha yuixunkin:
 —Hebreobun mekenika yushin Jehová Diosun eska mia ana yuikiki.
 Ninkawe: ¿Jatian ana jointi kushiama niti itan min ea ninkaxanai, ea
 bebunua babuidan? Jaska en mia yui ai keska enabun jau ea kenwain
 bununbun ana jatu nemayamawe. ⁴ Ninkamas min ana jatu nemaya
 meshukidi min mai jidabi anu shini midimajaida en yunuxanaii.
⁵ Minabun jau mai uinyamanunbun shini nidi ibidan mai dasibi
 bepuxankanikiki. Matun bai anu yunu betsa betsapa badux ui ikin ja
 texe washina pikin matun miban ji tibidi pikin keyuxankanikiki. ⁶ Shini
 tatashki iki jikibain min jiwe jawendua betsa betsapa anu inun min
 medabewanika xanen ibubun jiwe inun minabun jiwe tibi anudi jiki
 mataxankanikiki. Nenu jiwei taenibu anua shini bexanai keska min
 epabu inun min juchibun jaska uianma ikubidanibu na man jiweatian
 jaska taxnixanikiki— akin

Moisin yuibia Faraónen ana ninkamajaidaken jancha watan
 dabekebaini Moisés inun Aarón kainbainaibun ⁷ jawaida jawen
 medabewanika xanen ibubun Faraón yuikin:

—Ja junin nuku nuitapawakin nuku ichakawakubainaidan,
 ¿jatian nuku jenexanimenkain? Jau jatun mekenika yushin Jehová
 kenwantanunbun jatu nichindiwe. Nukunabu mawai keyutidubuki.
 Nukun inabu inun nukun miban shadabu ma nuku yamawankin ma
 keyuabudan, ¿min uianmamen?— akabu

⁸ jawen tsumabun jancha jatu ninkatan jau ana jatu itanunbun, iwanan,
 yunua beabu Faraónen Moisés inun Aarón yuikin:

—Matun mekenika yushin Jehová kenwain buditankanwen. Min jatu
 iyudiamadan, tsuabu min jatu iyuimenkain ea yuikanwen— jatu wa

⁹ Moisin kemakin:

—Jawen kenwanti piti pikin besikin nukun mekenika yushin Jehová
 nun kenkayabiwakatsi ikaiwen taexun nukun bake mishtinbu inun,
 nukun anibubu inun, yuxabubu inun, nukun juni bakebu inun, ainbu
 bakebu, inun nukun chaxuwan inun, nukun ina awa dasibi beabainkin
 nun jatu iyu keyukatsis ikaii— aka

¹⁰⁻¹¹ sinatakin xabakabi Faraónen jatu yuikin:

—Uindakanwen. Ekidi man chakabu jatu shinanmanun ika ikai
 jau ea ana dayaxunyanunbun ea jatu jenemabainkin matun
 mekenika yushinbetan matunabu man jatu paxa wanun ika ikaii, ea
 jatu unanti wamakinan. Man jaskabaintidubumaki. Matun mekenika
 yushin man kenwankatsi ikaidan, juni ewabus man jatu iyutidubuki.
 Buditankanwen— jatu watan jabun Faraón chikishwaibu jau jatu
 nichinunbun jawen tsumabu Faraónen jatu yunua Moisés inun Aarón
 nichinxunabu

¹² kainbainaibu Jehován Moisés ana yuikin:

—Egipto mai jidabi anu shini bekin jawada badux ui ikin tenankin texewashina jau jabun pikin keyununbun min meken sananbaunwen— aka

¹³Moisés jawen mestenti sananbaunaya badi juaikidia Jehován niwe xunku imabidana badidi inun meshu medan niwe xunku ishianyan janua pena betsatian niwen shini midima iwea ¹⁴Egipto mai jidabi shinin achimakin keyubaunaya jati min tanatiduma bei, jati uinpaunibuma bei jati ana uianma ixanaibu na jabiatian besti bekin ¹⁵mai bepukin keyuaibun jaska waxun min mai uintidumaken jawada badux ui ikin tenanma ikima pikin keyukin Egipto mai jidabi anu yunu pei inun ji pei pikin yamawaibun

¹⁶⁻¹⁷datejaidakin Moisés inun Aarón jau jawaida itanunbun jawen tsumabu Faraónen jatu yunua buxun jatu iweabu Faraónen jatu yuikin:

—Matun jancha ninkama inun matun mekenika yushin Jehová ichai en chakabushinaki. En matu yukai en jakidi chakabushina ea buaxuntan jau shini chakabu ea nemaxunun ea kushipa yukaxunkanwen— jatu wa

¹⁸jawen jancha ninkatan Faraónen jiwe anua kainkaini kaxun Faraónkidi Moisin Jehová Dios kushipa yukaxuna ¹⁹badi jikiaikidia Jehován niwe kushipa maewa niwe bekin xunku imaya shini midimajaida niwen bukin lanenwan Tashipa medan jatu dasibi pukukin jaskin keyuken Egipto mai jidabi anu shini ana jayamajaidaken ²⁰Jhován Faraón juinti kushi waken Israelin enabun kenwain bupananbun Faraónen jatu ana bashiaya

Meshuwen jatu kupinikiaki, na janchadan

²¹januxun Jehován ana Moisés yuikin:

—Jau ana mapubaunkin jamapai shadabu uinyamanunbun Egipto mai jidabi anu jau meshui keyunun min meken naiudi sananwen— aka

²²⁻²³naiudi jawen meken Moisin sananyan janu Egipto nawabu jiwebaunabu anu meshu ten ikaitun jatu achishina yame ikibi ishinxun xaba dabe inun besti badi jayamaken jaska waxun ja dapi jiweabu ana uintidubuma inun jawa ana jaskatan maputidubumaken jakia janu Israelin enabu jiwebaunabu anu besti badi pexei chaxaken

²⁴januxun Faraónen Moisés inun Aarón jau jatu itanunbun jawen tsumabu yunua buxun jatu iweabu Faraónen jatu yuikin:

—Matun mekenika yushin Jehová kenwain butankanwen. Dasibi minabube inun matun bake dasibiya bukin jakia matun chaxuwan inun matun ina awa bashibaintankanwen— jatu wa

²⁵jakia Moisin kemakin yuikin:

—Nukun nun aki kaidan, jaskamaki. Mian min nuku shinanxuna min shinanen nukun inabu nun bashibaintidubumaki, nukun inabu nukun mekenika yushin Jehová inankin tesentan nun menu keyuxuni

kaidan. ²⁶Jadatuda yuinaka pepa ikis nun katubaintidubumawen taexun dasibi nukun inabu nun jatu iyuaii. Jadatudawen nukun mekenika yushin Jehová nun kenwanxanai inun janu niti itan janixunda nun axanai anu nun unandiamawen taexun nenu nukun inabu bestichai nun jenebaintidumajaidaki— akaya

²⁷ana januxun Jehován Faraón juinti kushi wa Israelin enabun Jehová kenwain bupananbun jatu nematan ²⁸januxun ana Moisés nichinkin:

—Eanua kaindikainwen. Natian min ea anu ana jutidumaki. Ana jawenchains juyamaxanwen. Min ana ninkamas juaya en mia jatu tenanmaxanaii— aka

²⁹jawa dateama Moisin kemakin yuikin:

—Peki. Chanima min ea yuiiai. Ana jawenchains min besu en mia uianmaki— atan kainkainun ikaya

**Egipto nawabun bake iyuabu mawaxanaibu Jehován
Moisés banabimanikiaki, na janchadan**

11 ¹januxun jawaida Jehován Moisés ana yuikin:

—Faraón inun jawenabu anua dami atimapa betsa wakín en jatu uinmakatsis ikaii. En jaska waya man kainbainunbun matu ana nemama ibubis jawen kushipawen matu nichinxanikiki. ²Natianan, minabu Israelin enabu junibu inun ainbuaibu ja Egipto nawabu jatu dapi jiwebaunabu jatun oro mabu inun jatun plata mabu jau jatu ea akubaununbun jatu yunuwe— axun ³jau jatuki yaushiyamanunbun Egipto nawabu Jehován jatu bechipaima Israelin enabun jatu ea akubaunaibu jatun mabuwén nuiama jatu inankubaunaibun Moisés juni min atidumawen taexun jakidi dasibibun pe shinankin Faraónen medabewanika xanen ibubu inun Egipto nawabu dasibi: “Moisés kushipaki”, mesejaidakin jatu inanxankanikiki— aka

⁴Moisin Faraón ana yuikin:

—Jhován eska ea yuiiai mia yuinun ninkawe. Na jabia yamenapun en ea Jehová Egipto mai pakea jidabi anu en iaketanaya ⁵jiwe tibi anua minabun bake iyua bestibu tibi mawabaunkanikiki. Miadan, min xanen ibubiaken min juni bake iyua min xantukun xanen ibuxanai mawadiaxanikiki. Jaska inun, matun esclava dayanika ainbuaibun matu xekiwan denexunmisbun juni bake iyuabudi mawai keyuxankanikiki. Ja dikabi matun inabu bene jabu dukun kainmisbu mawai keyudiaxankanikiki. ⁶Jaskaken janu Egipto nawabu jiwebaunabu anua jatun bakebuwen nuijaidai bis bis iki kaxajaidaxankanikiki. Uatian tenei kaxanibu keskama inun jaska ana kaxama ipaxanaibu binui kaxajaidaxankanikiki. ⁷Jakia minabukidi inun Israelin enabukidi Jehován jaskas shinanma man unanxanun Israelin enabu inun jatun inabu uin jau jatun kamanen jau jau ayamanunbun matun kaman dasibi

Jehován jatu nemaxanikiki. ⁸Ja dikabi min medabewanika xanen ibubu dasibi eanu bexun eki danti itan ea ea akin: “Jaskakenan, nukun mai pakea jidabi anua kadiwe, minabun mia ninkamisbu iyuidan”, ea wadiabuma en katidumaki— akin Faraón yuitan

Moisin sinatajaidai Faraónen jiwe anua kainkainken ⁹chipu ana Jehován Moisés yuikin:

—Egipto mai jidabi anuxun jawen dateti dami betsa betsapa man jatu uinmatitudan, Faraónen matun jancha ninkama ikunkainxanikiki— aka

¹⁰jaska jatu yunua Faraón bebunxun jawen kupiti dami betsa betsapa Moisés inun Aarónen jatu uinmakin abiaxunkubainaya Jehován Faraónen jointi kushi wakin besu kushi wakubainaiwen taexun Israelin enabu kenwain bupananbun Faraónen jatu nichianmajaida inikiaki, bashikubainkinan.

Pascua besi taewanibukiaki, na janchadan

12 ¹Faraónen jiwe anua kainkaini Egipto mai pakea binubaindiamaken Moisés inun Aarónbe Jehová janchakin jatu yuikin:

²—Egipto nawabun uxe tanakin kenamisbu tibi ana shinanma na uxe daka benadan, matunmebi man ja tanabainkin chibanpakexanun na añoki tana taewakin matuna en matu axuain. ³Na jabias uxe 10 xaba kainaitian jiwe ibu tibitun jawenabubetan pinun, iwanan, chaxuwan kasmai cabra bakemenkain, bene babupabu jau katununbun jatu yunutanwen. ⁴Jakia jatunabu eskadabestun chaxuwan bake pikin keyutidubumaken juni betsa ja dapi jiweabe yubakatan jatunabus tanatan: “Chaxuwan bake bestichai nukunabubetans man pitiduki”, iwanan, ja dabetun chaxuwan bake bestichai biabu jiwe bestichai anuxun jatubetan pi jau jatuki dasixanunbunwen. ⁵Chaxuwan bene badi bestichaiya jawa isin jayama jawen yuda dasibi pe keyu jau bixanunbunwen. Chaxuwan bake kayabi pepa jayamaken ina chaxu betsa cabra bake bitidubuki. ⁶Bitan mekekubainkin uxe xaba 14tian jati xabatian ma badi jikiaya meshudiamaken jabiatiani jiwe ibu tibi dasibibun ja jatun piti chaxuwan jau tesenxanunbunwen. ⁷Ja chaxuwan tesentan jawen jimi dasibitun kenchaki kesunxun bikin mata waxun ja jiwe anuxun ichaxun piaibu anu jawen jikiti xui beputi ji istabin dabe inun jawen makishkunki chaxuwan jimiwen jiwe ibu tibitun jau puxa keyubaunxanunbunwen. ⁸Ja jabias meshutian jiwe tibi anuxun chaxuwan bake jiki keunxun xuixun pikin misi xaxama inun miban betsa muka jusia jau naixanunbunwen. ⁹Paxa inun juadi jau pitaskayamaxanunbunwen. Jakia jawen buxka inun jawen punyan dabe inun jawen kishi dabe jawen yuda dasibi taeyabis chi anu jau xuixanunbunwen. ¹⁰Xaba betsatian piti jenekin jau texe

wayamaxanunbunwen. Ma xabakidanaya jatida texea jau kuakin keyuxanunbunwen. ¹¹Jehován kushipa shinanti piti man besikin piaidan, tadi sawe pewatan inun bichi tae sawetan inun matun mestenti tsumatan kainbainkatsi jawaida pixankanwen, Jehován Pascua shinankin pikinan. ¹²Ja man jaska waitian jabias meshuki Egipto mai jidabi anu iaketankin jiwe tibi anuxun jatun juni bake iyuabu inun jatun ina bene jabu dukun kaianbu dasibi tenankin Egipto nawabun jatun dami yushin tibi en kupi keyuiai. Ea en jiwemis Jehován jaska en matu yuiai.

¹³Ja jiwe anu man ika tibi anu jaki dasitan en jawen matu unanti waxanai jimi ma puxabu uintan mia inun minabu en matu dunkebainkin Egipto nawabu kupikin matun juni bake iyuabu en matu tenanamma ixanai. ¹⁴Jamebi jiwemis Jehová Dios en eaki. En jancha ikunwankin en yunuti shinankin año tibi na uxe 14 xabatian ea kenwain besikin pikin jeneyamakubainxankanwen. Matun bakebu inun matun bababu pajaidai año tibi jabias uxe jabiatiani jawa jakimama jabundi ea kenwain jau janu besipakexanunbunwen, jeneamadan. ¹⁵Na jabias besi man akaidan, 7 xabatian misi xaxauma pikubainxankanwen. Ja besi man taewaitianan, misi xaxawati matun jiwe anu jayayamaxankanwen. Jamen ja 7 xaba besitian tsuanda misi xaxawatiya piaibudan, kupikin matunabu anua jau jatu nichinxanunbunwen, jawenabube ana jiwemamadan. ¹⁶Jehová kenwain besi taetaitian ja dukun xaba inun jawen jenei xaba ja xaba dabe medibijaidatian jau dayayamapakexanunbunwen. Jakia jatun piti besti bawatidubuki. ¹⁷Egipto anua en matu kainmabainaiwen taexun ja misi xaxama besitian piti watan jau pipaxanunbunwen. Matun bakebu inun matun bababu pajaidakubainkin na jabias Pascua besi jakimama año tibi jau besikubainxanunbun en yunuti jancha en matu mestenwanmaii, pakin jatun epa tibitun jawen bakebu jau jatu yusinpakexanunbunan. ¹⁸Año tibi janu uxe ja dukun xaba 14tian badi kaya misi xaxawatiuma pikin taewakin matu dasibitun chaxuwan namiyabi misi xaxawatiuma pikubainxankanwen. Janua xaba 21tian badi kaya ana misi xaxawatiya ma ana pikin taewabaintiduki. ¹⁹Misi xaxawatiuma pikin besikin ja 7 xabatian tsuabunda misi xaxa piaibu minabu kasmai nawa matube jiweabumenkain, jatu nichianbu matube ana jiwetidubumawen taea matun jiwe tibi anua jawen misi xaxawati jau tsuabuda jayayamaxanunbunwen. ²⁰Ana jabiasdi en matu yuai ea ninkakanwen. Janida man jiwekunkainai anuxun besikin misi xaxama besti matun pitiyabi pikubainxankanwen— akin Jehován Moisés yuia

²¹Janua Israelin bababu xanen ibubu tibi Moisin kenakin ichawaxun jatu yuikin: “Jiwe ibu tibitun chaxuwan bene año bestichaiya isin tene jayama dasibi jawendua jawen yuda xunpin bixun tesenxun ²²⁻²³kenchaki jawen jimi kesunkin mata waxun ni pei meske meske axun neakin buxukuatan jimi pukutantankin janu jikiti xui beputi ji istabin dabe inun

jawen makishkunki jimiwen puxakin jau keyuxanunbunwen. Egipto nawabu kupikatsi iki jawen nai tsumabe Jehová jukin jawen beputi ji istabin dabe inun jawen makishkunki jimiwen man puxabu uinkin jau matun juni bake iyuabu tenanyamaxanun jatun debuwanika nai tsuma nemai matun jiwe tibi manaundi dainbainxanaiwen taea penadiama matun jiwe anua kainyamayuxankanwen. ²⁴Matu inun matun bakebu inun matun bababu pajaidakin na yunuti jancha ikibi ini shinankin Jehová kenwain man besikunkainxanai, badi tibi jakimamadan.

²⁵Jaska matun xenipabu yubani ja maiwan pepa Jehová Diosun matu inankin ibu wamaxanai anu man jikia na matun juni bake iyua tenanma dunkeakeakebaini jawen shinanmati besi jau jakimayamaxanunbunwen, badi tibi shinankubainidan. ²⁶Badi tibi janu jawen jikiti xui beputi ji istabin dabe inun jawen makishkunki chaxuwan jimiwen man puxa keyuaya matun bakebun matu yukakin: ‘¿Jawa yuiamen, jimiwen man ji puxaidan?’ matu wabu ²⁷eska jatu yuiwe: ‘Egipto nawabu kupikin jatun juni bake iyuabu Jehová jatu tenankin Israelin bababun jiwe tibi dunkeakeakebainkin nukun xenipabu medibi waniwen taexun jimiwen puxakin nukun mekenika yushin Jehová nun kenwanmiski’, akin na jabias jancha en matu yuixu matunabu yuiditankanwen”, akin Moisin jatu yuia buxun jatunabu ichawaxun xanen ibu tibitun jatu yui keyuabu ninkatan Israelin enabu dasibi Jehová kenwanun ika beui beti iki keyuxun kenwantan ²⁸januxun jaska jau jawada anunbun Jehová n Moisés inun Aarón yuixu tapinkin unantan akaibun

Egipto nawabun juni bake iyuabu mawanibukiaki, na janchadan

²⁹jabiatiandi bebunkidi jaska yuia jukin yamenapun Egipto nawabun jiwe tibi anuxun jatun juni bake iyua tibi Jehová jatu tenan akeakebaunaya Faraón xanen ibun juni bake iyua jawen xantukun xanen ibutidu ja dukun mawai taeaya janua juni bichiti jiwe medanuatundi bake iyuabu tibi mawai keyudiaibun jatun inabu bene ja dukun kaian mawai keyudianibuki. ³⁰Jaskaibun meshu medan Faraón inun jawen medabewanika xanen ibubu dasibibu inun Egipto nawabu dasibi bestentan butubaun jiwe tibi anua mawaibuwen taea bis bis iki keyubauni kaxa chakayamaibun ³¹jawaida jabias meshu medan Moisés inun Aarón jau itanunbun, Faraónen jatu yunua buxun jatu iweabu Faraónen jatu yuikin:

—Matu inun matunabu bui keyui ikis enabu jenedibainkanwen. Jaska man yuishina matun mekenika yushin Jehová kenwain budikanwen.

³²Jaska man akatsis ishian matun chaxuwan inun matun ina awa dasibi iyui budikanwen. Buxun matun mekenika yushin kenwankin ea dikabi yukaxunkanwen— akin juinti nishma punu nukaxun jatu nichian

³³Israelin enabu dasibi jau jawaida bununbun jatuwen datekin shinain: “Jatuwen taea nukudi nun mawatidumenkain”, iki yuinamekin jatun

mai jidabi anuxun Egipto nawabu dasibibu jatu nichinbaunaibun ³⁴ma bukatsi jatun mabu pewakin jatun misi xaxadiama kenchu medan tadiwen yabutan ³⁵jaska Moisin yunushina jatun oro mabu inun, jatun plata mabu inun, jaya besiti tadi jatu ea amabaunshina ³⁶Jehován Egipto nawabu jatu mesewaxunaya jamapai shadabu ea ikaibu Egipto nawabun jawaida jatu inan inan abaunaibun jatun mabu dasibi bukin Israelin enabun Egipto nawabu jatu nuitapajaidawanibukiaki.

Israelin enabu Egipto anua paxanibukiaki, na janchadan

³⁷Jabia meshu medan Ramsés anua kainkainkin jenebaini Sucotkidi Israelin enabu bui ainbuaibu inun jatun bakebu tanama 600,000 juni ewabu juinti kushi detenametidubu jawenabube main bukin ³⁸jatun inabu ichapajaida iyuaibun nawa betsa betsapa Egipto nawabun jatu achinibudi jatube paxadiaibun ³⁹Egipto nawabun jatu jawaida nichiaibun jaska waxun piti pewatima paxai bukin misi wakin sapa waxun tsuitiki bawaxun pikubainibukiaki.

⁴⁰⁻⁴¹Egipto mai pakea anu 430 año Israelin enabu pai jiwekubidani jati año ma keyuken Egipto mai pakea anua kainbaini Israelin enabu xanen ibu kushipabu tibi jawenabube paxakin Jehován jancha ikunwankin Moisés chibanbainibukiaki. ⁴²Jamebi jiwemis Jehová kenwankin ja meshu medan nukun xenipabu kainmabainkin jatu iyuni ja Pascuatian man shinankubainxanai. Egipto mai pakeanua Jehován jatu iyuniwen taexun año tibi jabias uxe inun jabias fecha shinankin Israelin enabu pajaidai jiwekubainkin Jehová Dios kenwain jau besikubainxanunbunwen, jakimamadan.

Nai kuin budu tsaua mai anu butua badidi uinkin ana damia chi jede keskadi meshu medan Diosun jatu uinmakubainikiaki, na janchadan

13 ¹⁷Faraónen jatu ana nemama Israelin enabu Egipto mai pakea anua jenebaini Canaán nawabun mai pakeakidi bui chaimabiaken jabu jaki sinataibun mai pakea anu Diosun jatu iyukatsi ikama shinankin: “Filisteo nawabuki datei jatube detenamekatsi ikama shinan betsatan Egipto anu Israelin enabu ana chintuntidubuki. Ja baiwen en jatu iyuamaki”, ixun ¹⁸Ianenwan Tashipakidi jawen kexa anu janu tsua jiweabuma anu Diosun jatu iyubauna Egipto anua xanen ibubu bexmas tibi jawenabube kai Israelin enabu dasibi buaibun ¹⁹jatun xenipabu xanen ibu José mawa jawen yuda maiwama jawen xau bau medan nanexun dintu medan jawenabun adunibu Moisin jatu bumaya jaska Josén jatu yubakin: “Nukunabu pakubainxanaibu Diosun jatu ana shinankin iyuyaya nenua en xau jau buxanunbunwen”, jatu aniwen taexun jawen xau bau medan nanenixun buaibun

20-22 janua xabatian inun meshu medan jau chibanununbun nai kuin budu tsaua butuawen Jehová jatu bebuxunkainkin meshu medan chi jede watan jatu chaxawaxunbainkin Jehová jatu bebuxunkainaya Israelin enabun chibanbainaibun badidi nai kuin bututan jatu jeneama kai inun, meshu medandi chi jede keska kakin jatu jeneamadi jadidi bai kakidi jatu unanmabainaya Sucot anua kainbaini bui janu tsua jiweabuma kexa anu Etam anu jikixun uxakatsi jatun tadi jiwe puntebauntan janu uxaibun

Israelbu Ianenwan Tashipa pukebainibukiaki, na janchadan

14 ¹ana penaya Jehován Moisés ana yuikin:
²“Chintunkidan Pi-hahirod dapi Migdol inun Ianenwan Tashipa namakis jatun tadi jiwe ana jau puntexanunbun jatu yuiwe, Baal-sefón besuudi ianenwan kexa anu jau uxaununbunan. ³Man jaskaya Faraónen matukidi shinankin: ‘Chintun kextukunkaini jani kati unanma ma benuabuki. Janu tsua jiweabumanu bui jani butidubumaki’, ikin matu shinanxanikiki. ⁴Januxun ana Faraón en ninkaisma waken patapakin matu ana achinun ixun jawen detenamenikabubetan Faraónen matu chibanxanikiki. Matu jaska waya Faraón inun jawen detenamenikabu en jatu yamawaiwen taexun ‘Eadan, en Jehová emebi en jiweadan’, jawenabu Egipto nawabun ea jani unankayabixankanikiki”, akin jatu unanmaxun Jehován jatu yunua Israelin enabu chintunbidanaibun ⁵“Israelin enabu ma paxashinabuki”, akin Egipto nawa xanen ibujaida Faraónki chaniabu jawen xanen ibu bexmasbubetan Faraónen shinan betsawatan: “Nun jawa shinanmaken paxaibun nun jatu nemama ishianki. Nuku tsuan ana dayaxuntidumaki”, iki yuinamea akeakeaibun ⁶⁻⁷janua Faraónen jatu chibankatsi jawen caballon tadanbainti jau pewanunbun jatu yunua ma pewakin keyuabu 600 caballon tadanbainti pepas inun caballon tadanbainti ichapa betsa pe bexmas dasibi Faraónen jatu ichawamatan xanen ibu bexmasbun jabun tadanbainti xukua tibi jatu yunukubainaibu jatu chibanmakin: “Israelin enabu achinun”, ika bukin Faraónen jawen detenamenikabubetan jatu chibanbainaibun ⁸Jhován Faraón ninkaismakin juinti kushiwatan janua Israelin enabu paxaibu Jehován jatu kushipawaya kainbainshinabu Faraónen shinanma jatu achikatsis ikaya ⁹caballon tadanbainti anu mapubainaibu inun caballoki katsaumbainaibu jawen detenamenikabu jabu dasibibu Faraónbetan Israelin enabu achinun ika chibanbaini Pi-hahirod dapi Baal-sefón besuudi ianenwan kexa anu jatun tadi jiwe puntebaunshinabu anu bui ma badi kaya jatuki kemai ¹⁰Egipto detenamenikabu kushibidanaibun uin Israelin enabu datejaidakin jau Jehován jatu medabewanun kaxai keskakin Jehová yukabiakin ¹¹Moisés jancha chakabuwakin yuikin:
 —Egipto nawabun nuku tenanun ika bekanikiki. Jadi Egipto anua nun mawa jani nuku mai watidubumaken nenuxun nuku tenanun,

iwanan, ¿min nuku taxnimabidanshinamen, tsua jiweabuma anuxun nuku tenan bestinun ikadan? ¹²Janu tsua jiweabumanua mawama Egipto nawabu nun ana jatu dayaxunkubainaii, akin uatian mia yuikin: “Nuku jenedibainwen”, akin Egipto anuxun nun mia yuimaki— akin yuiabu

¹³Moisin jawenabu jatu kemakin:

—Datei babuama mestein juinti kushitan manakanwen. Jaska jatu maemakin Jehován matu medabewai samama man uinxanaii, ja yudabu matube bei matuki kemadiabuma ana man jatu uianma ixanaii.

¹⁴Jawawenda Jehován matu jatu nemaxunaya pes mapuxun man jatu uinxanaii— jatu waya

¹⁵jawaida Jehován Moisés ana yuikin:

—¿Datebiakin jaskakin min ea yukai? Badi juaikidi jau buxanunbun jatu yuiwe. ¹⁶Janua mianan, min mestenti ji jene bemaki sanankin jene paxkawe, jatu dami waxunkinan. Min jaska waken mai tsusinken janu bui paibainkin ianenwan namakis Israelin enabu mibe pukebainxankanikiki. ¹⁷Jakia eanan, jatu uinmakin jau matu chibain ianenwan namakis jikibainunbun Egipto nawabu jatu ninkaisma juinti kushi waxun Faraón inun, jawen detenamenikabu inun, jatun caballo tadanti inun, jabu caballoki katsaunmeabu dasibi yamawakin yuda dasibi en kushipa en jatu uinmaxanaii, jau jakimama shinankubainxanunbunan. ¹⁸Jaska jatun caballo tadantiki mapubainabu inun, jatun caballo katsaunmeabu inun, jatun xanen ibujaida Faraón debuaiwen taexun: “Ea en Jehová emebi en jiwea”, jaska unankubainxankanikiki, Egipto nawa dasibibun— aka

¹⁹nai kuin budu tsaua kayanbis Israelin enabu bebun kai Diosun nai tsumapan jawaida jatu betsa waxunkin bebun kai maewakin ²⁰nai kuin meshu wakin Egipto nawa detenamenikabu inun Israelin enabu namakis nichintan Egipto nawabukidi jatu meshu watan janua Israelin enabu anu jatu xabawabainaya janua Egipto nawabun Israelin enabuki jawa jatuki nukuama ishiainbun

²¹jabiatiandi jene bemaki jawen mestenti ji Moisin sananken badi juaikidia niwe kushipajaida xunku imashinkin Jehová ianenwan paxkakin ja namakis mai tsuin wankin dami wakin keyuken ²²janua yusiudi inun yusmaudi kebenkin kene keska juyunkin jene dabe waken ja namakis mai tsusin anu Israelin enabu pukebainbainabun

²³⁻²⁵jaska waxun Jehován ana jatu nemama Israelin enabu pukei keyuaibun Faraónen jatu uintan jatu yunua jawen detenamenikabu caballo katsaunmeabu inun caballo jawen tadanbaintiki mapubainabu dasibitun jabun achitanun ika buaibu jau jene jaki dasiwakin namakis jikikainkin jatu chibain pukebaini ianenwan namakis anu buaibu penaya chi jede budu tsaua inun nai kuin kayanbis medanxun Egipto nawa detenamenikabu jatu uinkin jatun caballon tadanbainti tae

chakabuwakin jani katiduma wakin jatu bika tenemakin Jehován jatu ichakawaya Egipto nawa detenamenikabu yuinamei:

—Jatun mekenika yushin Jehován nuku ichakawaikiki. Chintuin paxadinankanwen— ikaibun

²⁶ianenwan kexa betsaudi Israelin enabu pukei mapekei keyuabun Jehován Moisés ana yunukin:

—Ianenwanen Egipto detenamenikabu jau jatu achinun jene bemaki min mestenti ji ana sananwen— aka

²⁷ianenwan bemaki jawen mestenti ji Moisin ana sananken Egipto detenamenikabu paxapananbun penaya ianenwan ana jaki dasiwakin jene medan Egipto detenamenikabu Jehován jatu achimakin bichikin keyunikiaki. ²⁸Israelin enabu jatu achinun ika ianenwanu Faraónen detenamenikabu jatu chibain jikibainaibun jene ana jaki dasikin jatu achia jawen caballo tadanbaintiki mapuabu inun caballo katsaumbainaibu tsua jawa paxama ²⁹jakia bebunkidi mai tsusin anu bui yusiudi inun yusmaudi jene paxka dabea namakis Israelin enabu pukebainaibun

³⁰Egipto detenamenikabun jatu achipananbun Jehován Israelin enabu jatu medabewakin Egipto detenamenikabu jatu jasa mashi anu mawa maniabu uinkin ³¹jaska jawen kushipawen Jehován jatu kupixu uinxun jatun mekenika Dios Jehová kenwain jaki mesekin jawen tsuma Moisés kidi mesekin ja dabetun jancha Israelin enabun ikunjaidawanibuk iaki.

Benimai jawen juiwen Moisés kantanikiaki, na janchadan

15 ¹Janua Jehová Dios kenwain Moisés inun Israelin enabu jatun juiwen kantakin:

“Jatun caballo inun jaki katsaumbainaibu jenewen jatu achikin jasakin keyukin Diosun jatu yamajaidawaxuwen taexun en juiwen Jehová kenwain en kantanunkainxanii.

² Jakidi en kantanunkainun

ea kushipa wakin

Jhován ea medabewamiski.

En mekenika Dios kayabiki.

Jaskawen taexun jeneama en kenjaidawakubainxanii.

En epan mekenika Dios iniwen taexun

jakidi jancha pepa besti en jatu yuikubainxanii.

³ Jehová kushipajaidatun yudabu kushipabu jatu binumiski.

Jawen kenadan, Jehová jamebi jiweaki.

⁴ Faraónen caballo tadanbainti inun,

- jawen detenamenikabu kushipabu ianenwanwen jatu achimakin
 jawen detenamenikabu jabun jatu yunumisbu xanen ibubudi
 Ianenwan Tashipa anu jatu jasaxuki.
- 5 Mishki keskai jene nuajaida medan Faraónen detenamenikabu ibubis
 pukuaibun
 ianenwanen jatu achixuki.
- 6 En Xanen Ibu Jehováan, min punyan yusiudi kushipajaidawen
 miki sinataibu min jatu binumakin keyumiski.
- 7 Tsuabunda mia sinatamaibu
 min kushipa tsuan mia nematidumawen
 min jatu kupikin keyumiski.
 Jatuki sinatakin basi chushia kua keska wakin
 min jatu yamawamiski.
- 8 Jatuki sinatajaidakin jatu xun akin ianenwan min paxkaya
 jene tunkax tunkax ibiai
 mishkiwen kene kebean keskaxuki,
 janua ianenwan nuajaidabia namakis tea nia jawa takax ikamadan.
- 9 Janua Egipto detenamenikabun shinankin:
 ‘Jatu chibanbain achixun
 jatun mabu mebinxun paxkanun bukanwen,
 jatu jaska wai nun benimanunbunan.
 Janua dedati kenujaida chaipa sitan
 en mekenwen bais bais akin
 en jatu yama waxanaii’, ikaibun
- 10 jakia min xun akaya
 ianenwanen jatu xea keyuxuki,
 jene tunkax tunkax ikai anu mane shumbun xankama
 jamebi pukumis keskaidan.
- 11 En Xanen Ibu Jehováan, mekenika yushin betsa mia keska tsua
 jayamajaidaki.
 Medibi pepajaidakin dasibi min binu keyuaki.
 Jamapai shadabu wakin: ‘¡Jabaa!’ imakin
 min jatu datemamiski.
 Jaskabia jau mia kenwanxanunbun
 min pepa ikunkainaii.
- 12 Min kushipawen jatu kupikin
 mai tuax akin jaxpa watan mai min jatu xeamaxuki.
- 13 Nukunabu jatu detepananbun
 min nuikipawen nuku duawakin mekexun min jatu nuku
 nemaxunxuki.
 Egipto detenamenikabu anua min nuku jatu mebinxun
 min kushipawen min nuku yunuaii,

unanuma min jiwe medibi anu iyukinan.

14 Jaska min amis ninkai

nawa betsa betsapabu datejaidaxankanikiki.

Filisteo nawabu datei saki saki ikaibun

15 Edom nawabu xanen ibubu dakei

jawa janchabumaken

Moab nawabu kushipabudi datei saki saki idiaibun

Canaán nawabu kushipabia

ana kushipa jayama shinain dasibi jointi nishmaxankanikiki.

16 En Xanen Ibu Jehováan,

Egipto nawabu kushipa anua mebintan mina wakin

min nuku iweaya nun jatu dainbainkin keyudiana

min kushipawen datei

¡mishki keskai jawa tukuama jau pes manixanunbunwen!

17 En Xanen Ibu Jehováan,

jadi nun jiwenun mati medibi pepa min nuku katuxuni anu

nun jiwexanun nuku iyuwe,

min kushipawen min ma nuku pewaxuni anu janu min medibi jiwea anudan.

18 Jehováan, miadan, min xanen ibu ikunkainxanai, ikibi ikidan.”

Benimai María kantanikiaki, na janchadan

19 Ianenwan namakis caballon tadanbaintiki mapuabu inun caballo katsaumenikabube Faraón jikia Jehováan jenewen jatu achimaxuken jakia jabias ianenwan namakis mai tsusin anu bebunkidi Israelin enabu pukei keyubainabun ²⁰janua Marían Dios kenwain jakidi janchaxunmis Aarónen pui jawen mimawati bichi tudu tun tun atiya kai ainbuaibu dasibi bichi tun tun atiyabundi María chibain nawakubainaibun ²¹jatu kebi María kantakin:

“Egipto nawabu nuku binumakin jatu yamajaidawaxuwen taexun

Jehová kenwain kantikubainankanwen,

ianenwan medan caballo inun

katsaumenikabu ianenwanwen

jatu yamajaidawaxudan”,

ikaya ainbuaibun jatun mimawati tsuma Maríabe xekebaunibukiaki.

Unpax muka anuxun yudabun Moisés yuanibukiaki, na janchadan

22 Ianenwan Tashipa anua Moisin jatu kainmabainkin iyua bui janu tsua jiweabumanu jawen kena Sur anu xaba dabe inun besti bukubaini unpax jawa bechiama ²³atimas chacha betsa Mará anu nukuxun ja chacha unpax meabu mukajaidaken danankin: “Jaska nun atidumaki”, ikaibun

24ja jene mukajaidaken Moiséski sinatakin ana yuankin: “¿Unpax manuchakayamakin nun jania akai?” ikaibun 25Jehován jau jatu medabewanun Moisin jatu ea axunkin yuka ni maxu betsa Jehován Moisés unanmakin yuikin: “Ja ni maxu betsa ja jene mukajaida anu putawe,” aka jaska wa dami jene batajaidanikiaki, ana mukamadan.

26Januxun Jehován jatu yubakin yuikin: “Jaska en matu yunuai besti ea benimawakin en yunuti akubainkin en nemati ninka pewakubainkin en jancha dasibi man ninkakubainaibun Egipto nawabu en jatu yumanwanshina keska wakin en matu kupiama ixanaii. Jamen man ea ninkamajaidaken en matu kupixanaii. Eadan, en Jehováki, matun xuxa wanikadan, en ea bestiki.”

27Janua ana bukubaini janu 12 chacha netsuisma pepa inun 70 paninwan mapu anu jawen mae kena Elim anu jikiabu janu chacha unpax ichapa anu jatun tadi jiwe dunkemabaunkin puntebaunabun

Piti betsa uinsbuma Diosun jatu inankubainikiaki, na janchadan

16 1janua Elim anua Israelin enabu dasibi ana bui Egipto mai pakea anua paxai buimabu uxe ja kachu xaba 15tian janu tsua jiweabumanu jawen kena Sin anu jikiabu Elim inun Mati Sinaí namakis anua 2janua bunijaidakin june Moisés inun Aarónki sinatakin jabun yuankin 3yuikin:

—Egipto anuxun kenti nami mata inun xekiwan misi midima xaba tibi nun yanijaidawakubainaibun Jehován buni tenemakin unanxubida nuku debuwaya Egipto anu pe nun ikeanimaki. Jakia nenu janu tsua jiweabuma anuxun nuku buni tenemakin unanxubida nuku dasibi debuwanun, iwanan, shinankin man nuku iweshinaki— iake iakeaibun

4januxun Jehován Moisés yuikin:

—Piti nai anua ui keska wakin en matu nidi axuaiin. Ja yudabun xaba tibi kainbain jati ja xabatian besti pitidubu jau ichawakubainxanunbunwen. Tsuabunda en yunuti ninkaibu inun tsuabunda ea ninkabuma en jatu unanti wakatsis ikaii. 5Janua juindukuntitian ana jawa piti bitidubumaken ja juindukunti idiamaken semana tibi xaba meken buxkatitian janu piti ichapa dabeki bitan jatun jiwe anu jau buxun adukubainxanunbunwen— aka

6Moisés inun Aarónen ninkaxun jatu yuikin:

—Egipto anua Jehová bestitun matu iweimadan, na badi kaya jaska unantan man kenwanxanaii. 7Jaska inun, Jehován kushipadan, penama man uinxanaii. Jaska Jehováki man jaki ja ikai matu ninkakubainikiki. Uindakanwen. Nuku dabetun jaska Dioskidi nun matu yuibiakubaina ¿jaskai man nukukidi ja idiakunkainai?— jatu wa

8Moisin ana jatu yuikin:

—Man Jehová yuain ninkaxun man pinunbun badi kaya nami matu inan man yani wanunbun penaya misi ichapadi matu inandixanikiki.

Man nukuki ja ibiaya nukudan, nun jawamaki. Jakia nukuki ja ikama nukun mekenika Dios Jehováki man ja ikaii— jatu watan

⁹januxun jawen betsa Aarónki Moisin yuikin:

—Israelin enabu dasibi eska jatu yuiwe: “Matun ja iti jancha matu ninkaiwen taea ja kuin nai anua butua anu Jehová bebun ichakanwen”, akin jatu ea yuixunwen— akaya

¹⁰jaska Moisin Aarón yuixu Israelin enabu jatu yui janchaya jadi tsua jiweabumakidi uin dabekeabun jawen kushipa jatu uinmakin nai kuin butua chaxa chaxa ikaya ¹¹Jehován Moisés ana yuikin:

¹²—Israelin enabun ja ikaibu jatun jancha en ninkaxuki. “Badi kaya man nami piaii. Janua penaya misi pikin yanijaida watan en eadan, ‘En matun mekenika Dios Jehová’, man unanjaidaxanaii”, akin ea jatu yuixunwen— aka jabias janchadi Moisin jatu yuiaya

¹³janua badi kaya kuma keska midimajaida nuyabidani janu jatun uxati tadi jiwe puntebaunabu anu butuabu achixun detexun bawaxun piabun penayadi nibi ichapatun mai mecha wabia ¹⁴ma tsusinken mai anu jawada atsa nisa keska dudu mania ¹⁵uin unanbuma yuka iki: “¡Jabaa! ¿Jawamen?” ikaibun atimas Moisin jatu yuikin:

—Man ja pinunbun ja misi Jehován matu inankubainxanikiki.

¹⁶Jhován ea yuishina matu yuinun ea ninkakanwen. Badi tibi jati man pitidubu jiwe ibu tibitun jau ichawakubainxanunbunwen. Matun jiwe tibi anua jati yudabu tanatan matube jiweabuti 2 litro yuda tibituna ichawakin bixunkubainkanwen— jatu wa

¹⁷jaska jatu yuixu keska misi bikin jiwe ibu tibitun jatiditun ichapa bikin betsabun jatun yuda tanabain eskadabes duakabi buxun yaniwabun ¹⁸jaska Diosun jatu tanashina keska chibankin chichanki tanaxun ichapa buabu dasibitun pikin keyuabu texe jayabuma janua ichapama duakabi buabu pi jawa buniama jati jatun piti misi tanaxun bikubainibukiaki.

¹⁹Moisin ana jatu yuikin:

—Matun piti jawa texe wataskayamakanwen, adukinan— jatu wabia

²⁰jawa ninkama jatiditun: “Meshukidi pixanun”, iwanan, texe aduabu penaya chapui pisi maiyai xenajaidaken jaska uintan jatuki Moisés sinatajaidaya

²¹janua penaya tibi jati jawenabun pitidubu jiwe ibu tibitun ichawakubainaibun badi kukin ja misi payukin keyuaya ²²ja meken buxkati xabatian viernes penaya jawenabu tibi tanabain man bishian ana binumakin jabia tidi yuda tibituna 4 litro jati xaba dabe pitidubu bitanxun xanen ibubu bexmasbu Moisés anu buxun jaska yuiabu ²³jatuki sinatama Moisin jatu yuikin:

—Nadan, Jehován ea yuishinaki. Meshukidi juindukuntitian sábado medibiki. Janu nukun mekenika Dios Jehová nun kenwanxankanaii. Jawada xuikatsi ikin natian xuitidubuki. Jawada juakatsi natian ikis

juatidubuki. Ikis pitan jawen texe adukanwen, meshukidi pitidan— jatu wa

²⁴Jaska Moisin jatu yuia shinankin pitan jawen texe aduabu penaya jawa chapuama xena jayamaken ²⁵Janua Moisin ana jatu yuikin:

—Jehová kenwain man juindukunwainwen taexun piti texeshina ikis pikanwen, na xaba sábadotianan. Jabia xabatiandi nai anua misi piti man ana jawa biamaki. ²⁶Jakia ja meken buxka xabatian penaya man ichawatidubuki. Jamen metuti xaba juindukuntianan, janu daya jayama ikunkainxanikiki— jatu wabia

²⁷Jatiditun ninkama kainbain metuti xaba sábadotian: “Misi ichawanun”, ika buxun jawa bechiabumajaidaken ²⁸Januxun Jehován Moisés ana yuikin:

—En yunuti jancha inun en yusian jancha man danainan, ¿jatian man bextekexanai, en ana matuki sinatayamaxanunan? ²⁹Ninkakanwen. Ja juindukuntitianan, matun juindukuntiki. Meken buxkati xaba penaya dabeki piti ea Jehován en matu inankubainxanaii.

³⁰Jaskaken xaba metuti tibi juindukuntitianan, matun mae anu jawa dayai buyamakubainxankanwen, jakimamadan— jatu wa

³¹Nadan, nai anua misi piti Israelin enabun yuikin: “Manáki”, akin kenapaunibukiaki, jexe juxupa culantro bimi keskadan, jawen nis buna batapa kapan keskadan.

³²Chipu Moisin ana jatu yuikin:

—Jehován yunuti matu yuinun ea ninkakanwen. “Egipto anua matu iwexun nenu janu tsua jiweabuma anuxun misi en matu pimaima matunabu pakubainkin jau uinkubainxanunbun ja piti maná bishtu litro dabe mata watan jatu aduxunkubainkanwen”, akin ea yuishinaki— iwanan,

³³Jawen betsa Aarón yuikin:

—Jaki aduti kenti beputiya bixun nai anua misi litro dabe mata waxun jaki aduti kenti medan nanexun beputan nukunabu pakubainkin jau uinkubainxanunbun Jehová bebun jawen jatube yubakani jancha aduni bau medan tsaunwen, nukunabun jau jatu aduxunkubainxanunbunan— aka

³⁴Jaska Jehován Moisés yunushina keska wakin jau jatu aduxunkubainxanunbun ja dukun jaska bebunkidi jatube yubakani jancha aduni bau medan nai anua misi Aarónen adukin tsaunikiaki.

³⁵Bukubaunkin janu tsua jiweabuma anuxun Canaán mai pakeanu jikidiama 40 año nai anua misi Israelin enabun piyukubaunibukiaki. Janua janu yudabu jiweabu anu ma jikiabun Jehován ja misi ana jatu inanma inikiaki.

³⁶Jatun nai anua misi tanati, litro dabedan, jawen kena gomerki. 10 gomerdan, efa bestichaiki.

Moisin unpax jatu tuexunikiaki, na janchadan
(Nm 20.1-13)

17 ¹Jaska Jehován jatu yunushina janu tsua jiweabuma anu jawen kena Sin anua Israelin enabu dasibi uxakubaini bukubaini mai dasibi panpa jawen kena Refidim anu nukutan jatun tadi jiwe janu ana puntebaunabu januxun jania unpax atima ²ana Moiséski ja ikin yuikin:
—Unpax nuku inandiwe, nun anunan— akanwanbu Moisin jatu yuikin:
—¿Jaskai man eki ja ikai? ¿Jaskakin Jehová nukun mekenika Dios man unanti wai?— jatu wa
³ninkabiatan yudabun unpax manujaidakin Moiséski ana ja ikin yuikin:
—¿Jaskakin nuku unpax manumakin nuku inun nukun bakebu inun nukun inabu debu wanun, iwanan, nuku bika wakin: “Bunankanwen”, akawankin Egipto anua min nuku iweimamen?— akubaunabu
⁴jatuki Moisés datekin Jehová yukakin:
—Jawa en jatu axuanma en manaya mishki tunkuwen tsaka tsaka akin ea tenantidubuki. ¿Jatu jawa waxunpa, na yudabudan?— aka
⁵⁻⁶Jhován Moisés kemakin:
—Minabu ichapa bashiyubaini kakin Israelin enabu xanen ibu betsabube besti mia dukun bebukain ja Egipto anuxun min mestenti jiwén ja ianenwan min jawen bekushima bukin tsumabaini kaxun ja Mati Horeb anuxun en mia manai niken ja mishkipanwan min mestentiwen kushaxanwen. Min jawen kusha unpax tuei jabaxanikiki, minabun jau akubainunbunan— aka
Moisin jatu iyui kakin Israelin enabu xanen ibubun bedubi ja mishkipanwan jawen mestentiwen Moisin kusha jawaida unpax tuei ishchunikiaki. ⁷Israelin enabu ja ikaibuwen taexun ja mae anu unpax tuea Moisin kenakin: “Meribáki”, atan ja dikabi Jehová Dioskidi yudabun Dios unanti wakin yuikin: “Jhová Diosun nuku medabewaimenkain. Danankin nuku medabewamadaka”, ikaibuwen taexun jabias mae Moisin kenakin: “Masáki”, anikiaki.

Amalec nawabube detenamenibukiaki, na janchadan

⁸Ja mai panpa Refidim anua Israelin enabu budiabumaken jatu nichinun ixun Amalec nawa ichapabu bexun jatu dete taewaibun meshuaya jatu jenebaini meshukidi ana jatu detekatsi manaibun ⁹januxun Moisin jawen medabewanika Josué kenaxun yuikin:
—Meshukidi Diosun kushipa mestenti ji tsumatan ja mati mamaki anuxun matu uin en jadi nibaixanaii. Jaskawen taexun nukunabu detenamea unainbu jatu katuxun jatu pewatan Amalec nawabu detekin jatu binumakin jatu nichinxankanwen— aka

¹⁰jaska Moisin yunuai keska wakin Josuén jawenabu detenamea unanjaidaibu ichapa katukin jatu ichawaken janua penaya Aarón inun jawen chai Hur Moisésbe mati pishta anu mapekeaya Amalec nawabube detenamei taeabun ¹¹jadixun jawen mestenti Moisin manaundi sananyan Israelin enabun jatu detekin maemaibun janua Moisés ma punxukua juindukunun ika punpanianyan Amalec nawabun jatu detekin maemaibun ¹²janua Moisés ma jin ika ana jawen punyan sanantidumaken jawaida mishki ewapa bexun jaki tsauntan yusmaudi Aarónen metsuan yusiudi Hurin metsundiatan janua Diosun kushipa mestenti ji ja dabetun Moisés tsumamaxun Moisés sananmabaikin badi jikidiama Moisés jin iki punpanindiamaken ¹³Moisés jaskaken Josué jawenabubetan jatun deteti nupe chaipa kenujaidawen detekin Amalec nawabu mawakin jatu nichinibukiaki.

¹⁴Chipu Jehován Moisés ana yuikin:

—Mai jidabi anu Amalec nawabukidi shinantima wakin en tede akin keyuxanaii. Jabias jancha jawen jatu shinanmati una anu kenetan Josué yuikin unanmawe— aka

¹⁵jaska yunua Moisin atan jawen kenwanti chi tapu waxun kenakin: “En Jehová Dios jau ea unanpakexanunbun na kena en waxuki”, iwanan, ¹⁶yuikin:

“Jehová Dios xanen ibuai nemaibuwen taexun
Amalec nawabu pabiakubainaibun
Jhován jatu debuwakubainxanikiki, niti akamadan”, jatu
wanikiaki.

Israelin enabu Sinaí anu jikinibukiaki, na janchadan

19 ¹Egipto anua kainbidani beima ma uxe dabe inun besti binukainaya janua tsua jiweabumanu jawen kena Sinaí anu Israelin enabu jikinibukiaki. ²Janua Refidim anua bui mai napanpa betsa jawen kena Sinaí anu janua tsua jiweabuma anu jikixun ja mati keyatapa bebun jatun tadi jiwe Israelin enabu ana puntebaunabun ³Dioski nukui Moisés mapekeaya mati keyatapa anuxun Jehován kenakin yuikin:

—Moisiin, Jacobun bakebu pakubainaibu, Israelbudan, na jabias jancha min jatu yuitanun en mia yui ai ea ninkawe. ⁴“Jawada Egipto nawabu en akima inun tete peiwen nuyai keska kushipawen matu iwekin en matu mekebidana man uinkubidanshinaki. ⁵Janunkain en jancha ninkakin en yubati jancha man chibankubainaya mai jidabi enaswen taexun nawa xukuabu tibi anua en matu katuni enabu pepabus man ikunkainxanaii. ⁶Matu dasibi ebe janchanika xanen ibubu wakin enabus medibi wakin en matu jiwemakubainxanaii”, akin na jabias jancha minabu Israelin enabu ea jatu yuixuntanwen— aka

7jaska wa ninkabidan butuxun jatu kenaxun xanen ibubu ichawaxun Jehován jancha Moisin jatu yuia xanen ibu tibitun jawenabu jabias jancha jatu yuidiabu 8jabiatiani Israelin enabu dasibitun ninkatan kemakin:

—Jhován jancha min ma nuku yunuxu ninkatan chibankin nun akubainxanai— akabu

yudabu janchakanxu Moisin bui ana mapeketan Jehováki chanikin banabima 9janua Jehován Moisés yuikin:

—Uian. Nai kuin matun mae anu butetan ja medianu nun janchanameaya minabun ninkatan jau min jancha ikonwankubainxanunbun janua en mibe janchai kaxanai— iwanan 10-11—Minabu anu en jatu anu butukatsi ikai ikis inun meshukidi jau penunbun jatu yuiwe. Uxa dabetan dasibibun uiainbun Mati Sinaí anu en butuxanaiwen taexun nashikin jatun tadi patsakin pewatan jau ea manaxanunbunwen. 12Na mati en matidan, jau janu kemayamaxanunbun jawen nemati jatu waxunxanwen. Jaska watan jatu yuiwe, jau uindaxanunbunan, mesekidan. “En jatu kenamadan, mati anu jau mapekei janu kemayamaxanunbunwen. Jau janu bua binukain paiyamaxanunbunan, jadatuda ninkamas binukain kanekin chakabuwayadan, jau mawanun kupikin tenanxankanwen. 13Mekenen deteama jakia mishki tunkuwen tsaka tsaka akin inun pia kuinwen tsakakin jatu tenantidubuki, matunabu kasmai matun inabudan”, akin na jabias janchawen nemakin ea jatu yuixuntanwen. Eska besti ninkatan minabu ja mati anu kematidubuki. En chaxuwan maxun pudi atiwen jatu kenakin chan akai ninkatanan— aka

14Moisés mati anua butukidan jawenabu jaskakain jau mati dapixun jatun mekenika Jehová kenwanxanunbun jatu yunua jawenabu nashikin jatun tadi patsa keyuabun 15juni ewabus Moisin yuikin:

—Na man jaskaitianan, Dioski nukukatsidan, matumebi pepai ana uxa dabei matun ainbe chutanameyamakanwen— jatu waya

16xaba dabe inun besti penaya nai anua tin ikainkaini kana baka baka ikaya mati mamaki kuin meshu mayai anua jui chaxuwan maxun pudi akin chaipa waya ninkai jatun tadi jiwe anua yuda dasibibu datei saki saki ikaibun 17Dioski jau nukui bununbun Moisin jatu iyua mati tenanman anu jawen nemati anu mapuabun 18mati mamaki chi jede medan Jehová ma butuawen taexun chi kuinen Mati Sinaí jidabi achimakin bai ewapa kua keska jawen kuinwen mati anu pacha sakumaya 19chaxuwan maxun chan ichakayamai jeneama chaipaya Moisés janchaya tin ikainkainai keska juiwen Jehován kemaya 20ja Mati Sinaí ja besti budu keyatapajaidanu bututan jau janu nianu mapekenun Jehován Moisés kena janu mapekeaya 21Jhován yuikin:

—Ea uinun ika jawen nemati binubidani ichapa jau mawayamanunbun jatu nemai ana butuwe. 22En jatu kupiyamaxanun ebe jatunabu ea

janchaxunikabudi chaima eanu kemanun ika jatun shinan jau pepa wanunbunwen— aka ²³ Moisin Jehová kemakin:

—Mianu nun mapekepanan: “Na mati jawen nemati kenebaunkin enas ea waxunwen”, akin min ea yuishinaki. Min nuku nemashinawen taea Mati Sinaí minasken mianu kemanun ika mapeketidubumaki— aka ²⁴ Jehová ana yuikin:

—Bututan Aarón iwei ana jutanwen. Jakia eanu bekatsi ikaibu ea jatu janchaxunikabu inun minabu dasibi bei jawen unanti jau binubidanyamanunbun jatu nemawe, jakia ninkamas eanu beaibu en jatu kupitidukidan— aka

²⁵ butuxun Moisin jabias jatu yuia

**Diosun nemati inun jawen yunuti meken dabeti jatu
inanikiaki, na janchadan
(Dt 5.1-21)**

20 ¹ Januxun dasibitun jau ninkanunbun Dios janchakin eska jancha jatu yuikin:

² “Eadan, en matun mekenika Jehová Dioski. Jabun Egipto anuxun matun xenipabu tsuma wakin esclavo wanixun dayama chakayamakin bika jatu tenemaibu jadia ean en matu iweimaki.

³ Jaskaken jamapai yushin betsa betsapa duawakin kenwanyamakubainxankanwen, ea besti en matun Jehová Dioskidan.

⁴ Ja inun, betsadan, jawada jawen kenwanti dami wakin yushin itsa wayamakubainxankanwen, nai anu jiweabu inun, mai anu jiweabu inun, jawada jene medan jiweabudan. ⁵ Ja yushin betsa betsapa dami tibi anudan, ja bebun danti ixun duawakin kenwanyamakubainxankanwen. Matun mekenika Dios Jehovádan, en eaki, tsuabuda enabu waxun jatu mekei en jatu yaushimisdan. Jabun ea danankin dami betsa kenwainbu jatun ibubun chakabuwamisbuwen taexun jatun bakebu inun, jatun bababu inun, jatun bababun bakebu en jatu kupikubainxanaii.

⁶ Jakia jatun ea bechipaikin en yunuti jancha ninkatan chibanpakexanaibudan, jabu inun jatun bakebu paibu jatu bexteama jatuwen nuikin en jatu duajaida wanunbadiaii.

⁷ Ja inun, betsadan, eadan, en matun mekenika Jehová kenaki meseama jamen xabakabi yuiyamakubainxankanwen. Jakia meseama en kena jamen yuibaunaibu jawa jatu jakimama en jatu kupixanaii.

⁸ Ja inun, betsadan, sábado juindukuntitian jakimama ea shinain ja xabatian enas ikubainxankanwen. ⁹ Dayaidan, 6 xaba besti janu dasibi matun daya akubainxankanwen. ¹⁰⁻¹¹ Eanan, nai

inun, mai inun, jene inun, janu jiwea akeakeabu 6 xaba dayakin en jatu damiwaniki. Jakia janu juindukunti wakín séptimo xaba medibi wakín janu ea kenwanti xaba pewakin en medibi waniwen taexun semana tibi 6 xaba ikunkainaya matun daya dasibi akubainxankanwen. Jakia séptimo xabadan, janu matun mekenika Dios Jehová, eadan, janu ea shinanti juindukuntitan ipakexanikiki. Janu dayatimadan, matun juni bakebu inun, matun ainbu bakebu inun, matun juni tsumabu inun, matun ainbu tsumabu inun, matun inabu inun, nawa betsabu matun mae anu jiweabu jabu dayatidubumadiki.

12 Ja inun, betsadan, matun epa inun matun ewa duawakubainxankanwen. Man jaska waibun ja mai pakea anu iyuxun en matu ibuwamaxanai anuxun matu inun matunabu pakubainaibu badi ichapa inankin en jatu duawakin pe jiwemapakexanaii.

13 Ja inun, betsadan, e iskaun sinatakin tsua tenanyamakubainxankanwen.

14 Ja inun, betsadan, kemui ainyan inun beneyabia betsabe chutanameyamaxankanwen.

15 Ja inun, betsadan, yuda betsabun jamapai tibi biain yumetsutaskayamaxankanwen.

16 Ja inun, betsadan, yuda betsa jaskamabiaken jamenmens jakidi chanichakakin nuitapawayamaxankanwen.

17 Ja inun, betsadan, yuda betsan mae anu jawada jaya uin jawen kemutaskayamaxankanwen, jawen jiwe inun, jawen ain inun, jawen juni tsuma dayadu inun, jawen ainbu tsuma dayadu inun, jawen inabu inun, jawen jamapai tibi jaya uin jawen kemuamadan”,

akin Jehová jawen jancha jatu yuia

Israelbu Dioski datenibukiaki, na janchadan

(Dt 5.22-33)

18 kana bakatan tin ikainkaini inun, chaxuwan maxun pudi ati chan akin chaipa wai inun, chi kuin meshu mayai dasibibun ninkakin uin datei saki saki iki Israelin enabu chixtekidi xeketan benanta mapuxun 19 dasibibun dateyabi Moisés yuikin:

—Mian besti nuku jancha wawe, nun mia ninkakubainunan, jau Diosun nuku ana jancha wayamanunan. Nuku ana jancha waya nun mawatidubuki— akabu

20 jatu daewakin Moisin yuikin:

—Dateyamakanwen, man mawamakidan. Dios bututan man jaki datei mesepakexanunbun matu unanti waikiki. Pe bestikunkaini jiwei man ana chakabuyamaxananun— jatu wa

²¹benanta mestean mapuyaubun Moisés ana mapekei nai kuin meshupa anu ka Dioski nukunikiaki.

Dios jatube yubakani jancha ana jatu mestenwanmanikiaki, na janchadan

24 ¹Jehován Moisés ana yuikin:
 —Butuxun en jancha jatu yuitan Aarón inun, jawen juni bake dabe Nadab inun Abihú inun, 70 Israelin enabu xanen ibubu na en nia anu ana mapekekin jatu iwexanwen. Jabu beabudan, benanta niti itan jabun ea kenwain jau danti ixanunbunwen. ²Juadan, mia besti min eki kematiduki. Jakia ja mibe mapekeabu ea dapi betidubumaki. Ja dikabi Israelin bake betsabun mia chibain mapeketidubumadiki— aka
³Moisés butuxun Jehován yunuti jancha inun jawen nemati jatu pewaxunxu jawenabu yuia ninkatan dasibubun jui bestichai keskawen Moisés yuikin:

—Jawen jancha dasibi Jehová Diosun ma nuku pewaxunadan, ninkatan chibankin nun akubainxanaii— akabu

⁴Januxun Jehován jawen jancha dasibi yunushina una medan Moisin kene keyutan uxashini penaya butuxun mati tenanman anu jawen kenwanti mishki chi tapu jatu wamatan Israelin 12 juni bake jayani ja tibitun enabu xukua akeakeabu 12 jawen Dios shinanmati mishki keyatapa medibi Diosuna jatun kena tibiya chi tapu dapi jatu nichinbaunkin benimatan ⁵⁻⁶jau jabun ina awa Jehová Dios inankin menu keyukin Dios daewaxuntanunbun jatida bedunanbu Moisin yunua ina awa benes ichapa tesenxun jimi biabu paxkakin namakis kenchu betsa ewapaki juxketan janua jimi namakis betsa chi tapuki basha basha atan ⁷jaska watan Diosun yubati jancha una bixun jawen jancha dasibi jatu yuixuna ninkatan janus janchakin yuikin:

—Nukubudan, ana nukun shinanen nun itidubumaki. Jaska Jehován jawen yunuti nuku pewaxunai besti ninkatan nun axunkubainxanaii— akabu

⁸Januxun Moisés jimi kenchu betsa anua tsumatan ni peiwen jimi pukuxun jawenabu basha basha akubaunkin jabiatandi jatu yuikin:

—Na yuba jancha en matu yuixu na jimiiwen Jehová matube yubakaikiki, na jawen jancha en matu yuixu tuxkutima man jawen shinanpakexanunbunan— jatu watan

⁹janua Aarón inun, Nadab inun, Abihú inun, 70 Israelin enabu xanen ibubu jatu iyui Moisés ana mapekexun ¹⁰Diosun tae naman nenkati zafiro tapa nanketapa xabakabi nai keska chaxa chaxa ikijaidai anuxun jadixun jabun xenipabu Israelin mekenika Dios nia uinbiaibun ¹¹Diosun jatu kupiama Dios uinbetanan pikin nuxukin kenwankin keyutan Moisésbe ana butuaibun

Moisés Mati Sinaí anu ana mapekenikiaki, na janchadan

¹²Januxun Jehován Moisés ana yuikin:

—Nedi eanu ana mapekewe. Januxun ea manakawe. Jawen yunuti inun jawen nemati jancha uinmakin min jatu yusinkubainxanun min juai mishki tude sapa dabeki en ma kenea en mia inanxanai— aka

¹³⁻¹⁵xanen ibu bexmasbu Moisin yunukin:

—Nun kaya nenuxun ea manayuxankanwen, jatianda en chintuainan.

En betsa Aarón inun en chai Hur matube en bashiyubainaidan, tsuabuda chakabui ja ikaibu ea xanen ibuxunyuikin Aarón inun Hurin jau jatu pewanunbun ja dabe anu jatu iyuxankanwen— jatu watan jawen medabewanika Josué iyui Diosun mati nai kuinwen achimaken namakis anu mapekea ¹⁶Diosun kushipa jua niti ika ja Mati Sinaí anu 6 xaba kuinwen bepuken janua séptimo xabatian jadi kuin medanxun Diosun Moisés kenaya ¹⁷januxun jatun tadi jiwe dapi mapubaunxun mati keyatapajaida mamakia Jehován kushipa tsuan nematiduma chi jede keska ji ji ikai Israelin enabun uiainbun ¹⁸ana mapekei nai kuinen ja mati achia anu Moisés jikia jadia 40 xaba inun 40 yame Diosbe ikunkainikiaki.

Aarónen oro dami wakin awa bake wanikiaki, na janchadan

(Dt 9.6-29)

31 ¹⁸Mati Sinaí anua Moisésbe Jehová janchai menetan jawen yunuti inun jawen nemati jancha Diosun jawen shinanen mishki tude sapa dabeki jawen meken kayabis jaska kenea Moisés inanyan

32 ¹ja 40 xaba binukaini mati anua Moisés yane butudiamaken Israelin enabun uin Aarón anu junibus bua jaki ichaxun yuikin:

—Ja Moisin Egipto anua jatun nuku taxnimabidanimadan, ¿jaskashinamen? Nun unanmaki. Jaskakenan, nukun mekenika yushin betsabu wakin nuku dami waxunwen, jau jatun iyukin nuku bebuxunbainunbunan— akabu ²jatun jancha Aarónen ninkatan jatu yuikin:

—Oro pau matun ainbuaibu anua inun, matun juni bakebu anua inun, matun ainbu bakebu anua jatu bianbaunkin keyutan nenu eanu betankanwen— jatu wa

³jatun oro pau peka keyuabu ichawatan juni dasibibun Aarón anu bebidan bebidankin inanbidanbidanaibun ⁴Aarónen bitan oro pau dasibi mishki kuajaidatan jaki payukin chakan chakan akin ina awa baketiu wakin jawen xunpin wanti inun jawen mastatiwen Aarónen datsa datsa akin xunpin wankin ina awa bake dami waken dasibibun uinkin jatu yuikin:

—Israelin enabuun, uinkanwen. Nadan, nukun mekenika yushin dioski, jatun Egipto anua nuku taxnimabidanimadan— jatu abaunaibun ⁵Aarónen jaskaibu uinkin dami bebun jawen kenwanti chi tapu watan juu kushipawen jatu banabimakin:

—Meshukididan, nukun mekenika yushin Jehová Dios benimawai nun beyusxanunbun ikis dasibi pewakanwen— jatu wa

⁶uxashini penaya butuxun Dios kenwanti inun jawen daewati akin jatun ina ichapa tesenxun ja chi tapu anu ina janaxun menukin keyuken yudabu dasibi tsaubaunxun pikin mabex akin keyutan dasibi benimai beyusaibun ⁷janua jaskaibun Jehován Moisés yuikin:

—Uinwen. Minabu Egipto anua min jatu iweimadan, jatunmebi chakabui benukanikiki. Jatu uin jawaida butukaintanwen. ⁸Jaskai pe jiwebaintidubu en jancha dama en jatu yuibiashina jawaida ea jenei paxkatan orowen ina awa bake dami waxun inankuin inankin yuinaka menu keyukin yuikin: “Israelin enabuun, ninkakanwen. Egipto anua nukun mekenika yushinen nuku iweimatun dami itsaki”, akin ma yuibaunkanikiki, minabunan— ⁹akin ana yuikin:

—Ja yudabu en jatukidi shinainan, mawa juinti kushijaidabu en jatu uiain. ¹⁰Jawa jatuwen nuiyamawe, natian en jatuki sinatajaidaiwen taexun en jatu yamawaidan. Jatu yamawatan mia pajaida wakin minabu en mia ichapa waxunxanaii, jatu kushipa wakinan— aka

¹¹jawen mekenika Dios Jehováki datekin daewanun ixun Moisin eska jancha yuikin:

—Jehováan, Egipto anua minabu min kushipawen jatu uinmakin min jatu iweimadan, ¿jaskai min jatuki sinata chakayamai? ¹²Egipto nawabun mikidi shinan chakakin: “Jhován jadixun jatu padantan mati matipa anuxun tenanun ixun jatu iyuimaxun mai jidabi anua jatu yamawashinaki”, ikin mikidi yuitidubuki. Mikidi jaska janchatidubuken jaska jatuki sinata jenei bextekediwe, minabu min jatu chakabuwatikidi min shinanxudan. ¹³Shinanwen. Miki chiti ikabu Abraham inun, jawen bake Isaac inun, jawen baba Israelin mia ninkapaunibu ja dabe inun besti ana shinankubainwen, jatu jakimamadan. Mian kayabis jabu tibi yubakin: “Bishiti wakin minabu en pajaidawakin na mai pakea jidabi en jatu yunua ibu wakubainxankanikiki”, jatu wakin min kenawen min jatu yubaniki. Jaska min yubani jakimama min shinan betsa wawe, jatuki sinatakin yamawamadan— aka

¹⁴Moisin jancha ninkatan jaska jatu chakabuwati janchaxu Jehován shinan betsa wai bextekeaya ¹⁵⁻¹⁶mishki sapa dabe waxun uke dabebi bishakin jawen jancha keneshinxun Diosun Moisés inan mebintan Moisés dabekekainkin jawen yunuti inun jawen nemati jancha unanti mishki sapa dabe bakebidani butukidanaya ¹⁷januxun jawenabu sai sai ikaibu Josué ninkakin Moisés juai yuikin:

—Nukun mae anua detenamei sai sai ikaibu en ninkaii— aka
 18jakia Moisin kemakin:

—Jaskamaki. Jatu binutan benimai sai sai ikaibu inun ma jatu deteabu
 bis bis ikaibudi en ninkamaki. Betsajaida en ninkaii— aka

19jatun uxati tadi jiwe puntebaunabu anu jikitushitan ina awa bake oro
 dami kenwain nawaibu bechitan uin jatuki sinatakin mati tenanmanxun
 mishki sapa dabe bakebidanxu sanantan Moisin puta dudukui sa iki
 keyuaya 20jaska watan jawaida oro dami washianbu Moisin tsumaxun
 chi anu napua oro dami ma menu keyua jatu dudumaxun janu unpax
 bimisbu anu jawen dudu jene anu sa sa akin jatun chakabu jatu
 unanmakin unpax oro dami duduyabi Moisin Israelin enabu dasibi jatu
 amakin keyutan 21ja jaska jatu wamashinakidi jawen betsa Aarón Moisin
 ja akin:

—¿Yudabun mia jawa chakabuwamabu jatuwen datekin Dioskidi min
 jatubetan jawa chakabujaidawashinamen?— aka

22Aarónen Moisés bepadankin kemakin:

—En xanen ibuun, eki sinatayamawe, na yudabun chakabu bechipaikin
 amisbudan, min unainwen taeadan. 23Jabun ea yuikin: “Min betsa
 Moisanan, Egipto anua nuku iwebiaima jaskashinamenkain nun unanmaki.
 Jaskakenan, nukun mekenika yushibu dami nun uinkubainxanun
 nuku axunwen, jau jatun nuku mekebainkin iyuxanunan”, ea wabu
 24ea jaska yunuabu jatu yuikin: “Man tsuabuda oro pau jayabudan, ea
 bexunkanwen”, en jatu wa ichawatan ea inanbu chi jede ji ikai namakis en
 napua ja oro dami ina awa bake keska jamebi taxnishinaki— aka

25juni betsa betsapabu Israelin enabuki sinatamisbu jatuki kaxetidubu
 Moisin unankin inun Aarónen jatu mekekin jatu jawa nemama jatun
 chakabu besti chibain beyakunkainai Moisin xabakabi uintan 26jatun
 mae kexa nixun jui kushipawen jatu yuikin:

—Tsuabunda man Jehová chibankatsis ikaidan, nedi ea anu ichai
 bekanwen— jatu jawenchains akawan Levín enabu junibu dasibi bei
 Moisés anu ichaibun 27Moisin jatu yuikin:

—Israelin enabun mekenika Jehován jancha matu yuinun ea
 ninkakanwen. Matun mane detenameti kenu chaipa bitan tadi jiwe tibi
 anu jikikubaunkin ja oro ina awa bake dami jabuan kenwain beyusi
 jenekatsi ikabuma jatuwen nuiama jatu detekin keyubauntankanwen, min
 betsabu inun, min jaibuaibu, inun mia dapi jiwebaunabudan— jatu wa

28jaska Moisin jatu yunua ninkatan Israelin bake Levín enabun jabu
 chakabui patapaibu detekin 3,000 junibus tenankin Moisin yunua
 axunkin menexunabu 29januxun Levín enabu Moisin yuikin:

—Natian Jehován jancha chibankin matun bakebu inun matun
 betsabu kupikin man jatu detexuwen taexun natian Jehován matu
 duawakubainxanun ika matu kushipawakin katuxuki— jatu wa

³⁰ uxashini ana penaya jawenabu dasibi Moisin ana jatu yuikin:

—Jawen jancha danankin dami yushin watan kenwainan, Jehová ichakawai man jaki kaxejaidashinabuki, chakabujaidaidan. Nukun mekenika Jehová anu ana mapekexun daewakin matun chakabu jau matu buaxunun en matu yukaxuni kائي. En jancha ninkatan Jehován ana matu kupiama ixanimenkain, matun chakabu ana shinanmadan— jatu watan

³¹ Jehová anu ana mapekexun yuikin:

—Chanimajaida yudabun min jancha danain chakabujaidakin oro yushin dami watan ja kenwanshinabuki. ³² Jabiaskabiaken eanan, en mia jatu ea axuaiin. Min jatun chakabu buakin ana shinanma min jatu kupiamadan, jaska peki. Jamen jatun chakabu shinankubainkin min jatu kupikatsi ikaidan, minabu jawen tanati una anua en kena min eki kenenidan, en kena ea tede adiawe— aka

³³ januxun Jehován Moisés kemakin:

—Jaskamaki. Tsuabunda ea danain chakabuwaibu besti jabuna besti en tede akubainxanii. ³⁴ Jakia natianan, en jatu kupiyuamaki. Jakia jadi en mia yuima anu minabu jatu iyuditaxanwen. Jau jatun mia medabewai bebuxunkainun en nai tsuma kushipa en mia yunuxunaii. Janu yudabu dasibi en jatu unanti waitian jabu chakabunibu jatun chakabuwen taexun en jatu kupixanii— atan

³⁵ januxun Israelin enabun jabun ja ina awa oro dami Aarónen jatu axunshina kenwanshinabu shinankin jawen jatu kupikin isin paepa jatu yununikiaki.

Jau bununbun Jehován jatu yununikiaki, na janchadan

33 ¹ Jabiatiandi Jehován Moisés ana yuikin:

—Minabu iyui nenua kadiwe. Ja dukun Abraham, ja kachu jawen bake Isaac, ana ja kachu jawen baba Jacob en yubakin: “Na mai pakea jidabi minabu en ibu wamaxanii”, akin ja dabe inun besti jabiaskasdi en jatu yubani anu minabu Egipto anua min jatu taxnimabidanima jatu iyuditaxanwen. ² En nai tsuma kushipa jau jatun matu medabewakubainun matube en yunuxanii. Man jadidi kanun jau jatun matu bai mextemabainkin nawa tibi jatun mai pakea anu Canaán nawabu inun, Amorreo nawabu inun, Hitita nawabu inun, Ferezeo nawabu inun, Heveo nawabu inun, Jebuseo nawabu matu nichinmaxanikiki. ³ Ja mai pakea anu man kaidan, janu inapan chuchu inun buna bata jamen ichakayamai anu man piti pepa jayaxanai anu bukanwen. Jakia eadan, en matube kamaki. Minabu patapabube kakin bai namakixun en jatu yamawakatsi ikamaki.

⁴⁻⁵ Eska ea jatu yuixuntanwen: “Man ninkaismawen taea matube en kamaki. Chai matube kadiama: ‘Matu yamawanun’, iwanan en

shinantiduki. Jaskawen dabanen en matu pewakin en jaska waxanai en unanxanun matun shinan chakabu jakimatan matun mane dauti dasibi pekakanwen, ana saweamadan”, akin jabis jancha minabu ea banabimaxuntanwen— aka butuxun jawenabu ichawaxun jaska Jehová yuixu Moisin jatu yuia jawen dateti jancha ninkatan juinti nishmajaidakin jatun mane dau yaushijaidabiakin pekakin keyunibukiaki.

⁶Jaska janchawen taea Mati Horeb jawen kena betsa Sinaí anuxun jatun mane dau Israelin enabun peka keyunibukiaki.

Janu Dioski nukuti tadi jiwe taewanibukiaki, na janchadan

⁷Ja mae anua janida jatu iyudiamata tadi jiwe wati bixun jatun mae dapi benanta Moisin jatu puntemaxun kenakin: “Janu Dioski nukuti tadi jiwekiaki”, aniki, jaskaken Jehová anua jawen jamapaikidi unankatsi iki janu buxun manatidubudan. ⁸Janua janu Dioski nukuti tadi jiwekidi Moisés kaya yudabu benia jatun tadi jiwe jikiti xui anu kaian nixun uinkin tanaibun ⁹ja tadi jiwe medan Moisés jikiaya nai kuin butukidan tadi jiwe jikiti xui anu nia nai kuin medan Junebia Jehová Moisésbe janchaya ¹⁰nai kuin jaskakidan beputi anu niti ika niken yudabun uin jatun tadi jiwe jikiti xui anuxun Jehová kenwain dasibi danti ikabu

¹¹tsuada jawen jaibube janchamis keskai benichimea Jehová Moisésbe janchapaunikiaki. Jaskatani Moisés jawen jiwe anu chintunkidanaya janua jawen medabewanika Nunen bake bedunanan Josué ja jiwe anua kainkin jenebidanama ipaunikiaki.

Jehová besu chaxa chaxa ikai uinbiai jawen besu Moisin uintiduma inikiaki, na janchadan

¹²Chipu janu Dioski nukuti tadi jiwe anuxun janchanamekin Moisin Jehová yuikin:

—Uian. “Minabu iyuxanwen”, akin min ea yuibiashinxun tsuan ea medabewaxanai min ea yunudiamaki. Jamen betsa ea yuikiran: “Min ea jaibuwani min eki chiti imis en unaiin. Min ea benimawamiski”, akin min ea yuidiashinaki. ¹³Na jaska nun janchamisan, chanimaki. Jaskawen taexun en mia ea aki ikai. Jaskada min nukukidi shinainmenkain, Juneama xabakabi ea unanmawe, nun padanananma ikunkainmis en jatu yuikubainxanunan. Ja dikabi Israelin enabu minabuki, shinanpakexanwen— aka

¹⁴Jehová yuikin:

—Peki. Ea kayabis mibe kakin medabewakin en mia unanuma mekekubainxanai— aka

¹⁵Moisin kemakin:

—Peki. Mia min nukube kakatsi ikamadan, nenua nuku taxnimakin nuku nichinyamaxanwen. ¹⁶Min nukube kama nukuwen min nuiai en

unantidumaki. Jakia min nukube kai nukuwen min nuiai en unantiduki. Nukube min kaya ea inun minabudan, nawa betsa betsapabu anua mina wakin min nuku katunidan, dasibibu mai jidabi anuxun mikidi unankubainxankanikiki— aka

¹⁷Moisin jancha ninkatan Jehován kemakin yuikin:

—Peki. Jaska min ea yukai keskadan, min ea benimawaya min kenawen en mia unainwen taexun jaska nun janchai en mia axunpakeξανai— aka

¹⁸Januxun Moisin ea akin:

—Jaskakenan, min besu chaxa chaxa ikai ea uinmawe— aka

¹⁹—Tsuabuda en duawakatsi ikai en jatu duawamiski. Tsuabudawen en nuikatsi ikai, jatuwen en nuimiski. Ean besti en jatu katumiski. Jaskakin en kena Jehovádan, mia unanmakin min besuudi en pepa dasibi en mia dainmabainxanaii. ²⁰Mia xabakabi yuinin ea ninkawe. Tsuanda en besu uintan jiwepaketidumaki. Jaskaken en besu min uintidumaki.

²¹Mati anu ea dapi mishki ewapa kiniya janu min nia en besu chaxa chaxa ikai kemaya mishki ewapa kini medan ²²mia beti atan mia petsinkitan en mia dainbainaya ²³en besu ma binukainken en mia jenea en pechi min ea uiaiin. Jakia en besu min ea uintidumajaidaki— iwanan,

**Mishki sapa betsa dabeki Diosun jawen yunuti inun jawen nemati kene
bena wanikiaki, na janchadan**

(Dt 10.1-5)

34 ¹Jhován Moisés ana yuikin:

—Mishki sapa dabe ibubis mexte dabewe, jaska ja dukun en mia inanshina keskadan, jaki en mia ana jancha kene bena waxuainan, ja ja dukun jancha en ashian min puta dudukui sa ishian keskadan. ²Jaska wakin pewatan penaya meshukidi mishki bena dabe bui Mati Sinaí mapetan ja mamaki ea bebun nixanwen. ³Tsua jau mibe mapekeyamaxanunwen. Ja dikabi minabun mati uin jau mapekeyamaxanunbunwen. Jaska inun, matun inabun basi pi jau mati bebun mapuyamadiaxanunbunwen— aka

⁴jaska Diosun yunushina keska wakin mishki tude sapa dabe jatiu daves ja dukun Diosun ashian keska wakin pewatan uxashini ma penaken bututan mishki sapa dabe bena tsumatan bui Mati Sinaí anu mapekea ⁵⁻⁶janua nai kuinwen Jehová bututan Moisésbe nitan ja bebun dainbainkin Moisés jui kushipawen jawen kena kayabis yuikin:

—Eadan, ¡Jhová Dios Jamebi Jiwemis en eaki! En nuikipa pepa inun en jin jinma inun en chanichakaisma inun en nuikipa itamamaki. ⁷1,000ti pakea pakubainaibu en nuikipawen kaneama en jatu mekepakemiski. Jatun chakabu jakimaidan, sinatabiaibu inun chakabuabunan. Jakia tsuanda chakabuwaken jawen kupitiwen en

nuitidumaki, ja chakabu shinankin jatu kupikinan, jatun ibubu inun, jatun bakebu inun, jatun bababu inun, jatun bababun bakebu jatube en kupipakexanaii— ikaya

⁸jaskai ninkatan Moisés jawaida main di itan beuxun Jehová kenwankin ⁹yuikin:

—Jehováan, ¡miadan, Jehová Dios Mimebi min Jiweaki! En mia benimawamiswen taea chanima nukube kaxanwen. Ja enabu juinti kushibuki. Jaskabiaken nukun chakabu nuku buaxuntan ana minabu nuku wadiwe— aka

Dios jatube yubakaima ana jatu pe waxunikiaki, na janchadan
(Dt 7.1-5)

¹⁰Januxun Jehován Moisés ana jancha wakin yuikin:

“Natian ana minabukidi en mia yubai ea ninkaidawe. Jaska en kushipawen en matu axuain dami ichapa dasibibun uinxankanikiki, jaska nawa betsabun uianma ipaunibudan. En jatu e imaiwen taexun janida man bukubainaibu anuxun en kushipa dami ichapa nawa betsa betsapabun uinkubainxankanikiki, en pepa matu anuxun en jatu uinmakubainaidan.

¹¹Natian jaska en matu yunuaidan, chibankin akubainxankanwen. Eanan, jatun mae tibi matu mebinmakin matun bedubi en jatu nichinkubainxanaii, Amorreo nawabu inun, Canaán nawabu inun, Hitita nawabu inun, Ferezeo nawabu inun, Heveo nawabu inun, Jebuseo nawabudan.

¹²Janu jikitan man jiwexanai anudan, jatube yubakanameyamaxankanwen, matunmebi mekeidan. Jamen man jatube yubakaidan, jatun beya matu beyawamatidubuki, chakabuwakinan, bidun medan jikia keskaidan. ¹³⁻¹⁴Eadan, en Jehováki, en kena betsa en Dios Yaushinikawen taexun enabu yaushikin en matu mekekubainaiwen taexun jawa yushin betsa kenwanma jaska en matu yunuai keska wakin jatun kenwanti tibi tekekubainxankanwen. Jatun yushin kenwanti chi tapu tibi yamawakin jatun yushibu shinanmati mishki keyatapa mapuabu inun jatun kenwanti ji medibi mapuabu dedakin keyukubainxankanwen, mae tibi anuadan.

¹⁵Ja dikabi ja mai pakea anu jiweabube yubakayamaxankanwen. Jabun ea danankin jamapai shadabu yushin kenwankin jatun chi tapu anuxun jatun yushibu kenwanti piti pewatan matu pimakatsi kenabu jatubetan pikin man ea jakimatidubuki. ¹⁶Jatube man yubakaken januxun matun ainbu bake jatun juni bakebun jatu ainwantidubuki. Januxun ja nawa chipashbu jatu ainwanbu jaska jatun beya chakabu chibankin yushibu shadabu kenwankin matun juni bake padankin jatun yushibu jatu kenwanmatidubuki, matun juni bakebu jabun ea dananmakinan.

17Ja dikabi mane payukin chakan chakan axun ja kenwanti dami ana akin metaskayamaxankanwen”, atan

Dios kenwain año tibi besikunkaintikiaki, na janchadan
(*Ex 23.14-19; Dt 16.1-17*)

18ana jatu yuikin: “Jaska en matu yunuima jakimama matun misi xaxama pi besikin akubainxankanwen. Jatian ja misi xaxama man piaidan, ea shinankin 7 xaba akubainxankanwen. Uxe Abib anu Egipto anua en matu taxnimabidanimawen taexun año tibi uxe Abibtian apakekubainxankanwen, janu jawen unanmatikidan.

19Ja dukun man bake wa matun juni bakebu kain taedan, dasibi ena dukun ikubainxanikiki. Ja dikabi matun ina awa inun, matun chaxuwan inun, matun cabra benes jabu dukun kaianbu dasibi enasdiki. 20Jakia asno bake bene ja dukun kaian enabia ibu wakatsis ikin ja asno bake xantukun chaxuwan bake bene kasmai cabra bake bene maewatan ea inankubainxankanwen. Jamen chaxuwan bake kasmai cabra bake man ea inankatsi ikamadan, asno bake kaians tetux akubainxankanwen. Ja dikabi matun juni bake tue bena ja dukun kaian enabiaken man ibuwakatsis ikin jawen xantukun chaxuwan bake man ea inantiduki. Jamen jawen inankuin man ea bexuanma matun juni bake janu eki nukuti jiwe anu iwexun man ea uinmatidumaki.

21Semana tibi 6 xaba besti dayakubainxankanwen. Jakia séptimo xabatian ea kenwain janu xaba bestichai anu juindukunkubainxankanwen. Daya ichapa man jaya miban banaitian inun bimi tsekattitianbiaken jawen nuiyama séptimo xabatian janu juindukunkubainxankanwen, ea shinainan.

22Ja dayakin man yunuima ja dukun xekiwan kaniai man tseka taewaxanaitianan, semana jidabi besikubainxankanwen, janu besti Besiti Semana wakinan. Ja inun, matun yunu dasibi ichawakin adu keyutan benimai besidiakubainxankanwen. Año tibi Pascuatian inun, Besiti Semanatian inun, Yunu Adukin Meneaitian shinain jaska tibi wai besikubainxankanwen, jakimamadan.

23Man jaska tibi akin betsa betsapa wai año tibi dabe inun bestiki janu eki nukuti tadi jiwe anu bedunanbu inun juni ewabu dasibi ea Jehová Israelin enabu mekenika Dios bebun ichakubainxankanwen. 24Man jaskakubainaibu matu bebunxun en kushipawen nawa xukuabu tibibun mae matu mebinmakin en matu nichinxunkubainkin matun mai pakea ana ewapa wakin en jatu mesewaiwen taea tsuan matun mae biantidubuma ixankanikiki. Jaska jakimama ja dabe inun bestiki ea kenwain ea beyusxuni ichai año tibi ikubainxankanwen.

25Ea duawakin benimawanun, iwanan, matun inabu ea kuaxunkinan, jawen jimi bixun misi xaxayabi jawen jimi jusitan

ea inankuinyamaxankanwen. Pascuatian Egipto anuxun matun jiwe tibi en detenika nai tsuman dunkebaini shinankin chaxuwan jiki keunxun xuitan pikin keyukin meshukidi pikatsi texe mekeyamakubainxankanwen.

²⁶Badi tibi dayakin matun bai anu jawada miban ja dukun man banaima iki taeai kaniai piana man ea bechipaiai ea unanmakin janu eki nukuti jiwe anu matun yunu bimi bexun jau ea bixununbun ebe matu janchaxunikabu inankuinkubainxankanwen.

Cabra bake pishta detetan jawen ibuan chuchuki jawen nami bawataskayamaxankanwen”, itan

**Jawen yunuti inun jawen nemati jancha
Moisin kenenikiaki, na janchadan**

²⁷Jehová́n Moisés yunukin yuikin:

“En yunuti inun en nemati jancha jakimatima mia inun minabu Israelin enabu dasibibube en mia jatube yubakubainxu ea kenexunwen”, akin mati anuxun Jehová́n Moisés yunua

²⁸jadia Jehová́ Diosbe Moisés niti ishian 40 xaba inun 40 meshu jawa piana jawa unpax akama jiweyuxun ja jawen yuba jancha yunuti inun nemati mishki tude sapa dabe benaki 10 jancha Moisin kenekin keyutan ²⁹Mati Sinaí anua Diosun yuba jancha unanti mishki sapa dabe bakebidani Moisés butui Jehová́be janchakunkainshinawen taea jawen besu chaxa chaxa ibiai jawa unanma jui ³⁰Moisés jawenabuki kemaya Aarón jawenabu Israelbubetan Moisin besu chaxa chaxa ikai uin jaki datei jaki kemabumaken ³¹januxun Moisin jatu kena Aarón inun jatun xanen ibubu Moiséski kematan jabe janchai bei jaki ichabun ³²chipu jawenabu dasibi mae jidabi anua bei Moiséski ichai jaki dasidiaibun Mati Sinaí anuxun jaska Jehová́n jawen jancha yunushina dasibi jatu xabakabi unanmatan ³³jaska jancha jatu yui keyutan jawenabu mesewakatsi ikama jawen tadi tuaxwen beyabukuken ³⁴janua Jehová́be janchai kanun ixun pekabaini Dioski nukuti tadi jiwe anu jikia janu jabe janchai keyutan ana taxnitan jawada Jehová́n yunuxu inun nemaxu jatu unanmakubainikiaki. ³⁵Janua jawen besu chaxa chaxa ikai uin jaki dateaibuwen taea jawen tadi tuaxwen beyabukukunkainikiaki, janu Jehová́ Diosbe janchamatianan, janu Jehová́be janchai kaitian pekatantanidan.

Janu Dioski nukuti tadi jiwe menenibukiaki, na janchadan

40 ¹⁶⁻¹⁷Egipto anua taxnibidanimabu badi bestichai nichintan ana badi betsa taekainaitian uxe ja dukun taeaitian inun jawen día taeaitian jaska Jehová́n Moisés uinmakin yunuima keska wakin janu Dioski nukuti tadi jiwe wakin nichinkin taewaima menenikiaki. ¹⁸Moisin Dioski nukuti tadi

jiwe jaska washinxun jaki taewabaunkatsi ji tuax tsaminkin keyutan jawen xau keyan keyutan januxun jawen chibu tibi beni keyutan ¹⁹jawen tadi tuax ewapa ichapa punte pewakin tadiwen mamaki jatu mabemaxun jaska Jehová yunuima keska wakín Moisin jawenabu puntemabaunkin keyutan

²⁰januxun mishki sapa dabe jaki jawen 10 jancha jawen yunuti inun jawen nemati ja tibi Dios yubakaima jancha Moisin bitan bau medan nanexun jawen bakebainti ji dabe bau xui anu mistutan jawen bepu kenadan, Dios nuiti watan bepukin achimatan ²¹janu Jehová medibi jawen nukuti tadi jiwe medan Dios yubakati unanmati aduti bau bichikin jatu tsaunmaxun pakenkin tadiwen junekin jatu puntemakin jabias Jehová Diosun yuishina keska wakín Moisin jatu amatan

²²januxun janu Dios jaki nukuti tadi jiwe uke medan ja dukun dintu anu yusiudi nortekidi jawen kenwanti tapu jatu tsaunmakin dintu medibi xabakan jatu tsaunmatan ²³jaska Jehová yunushina keska wakín Jehová bebun pewakin jawen kenwanti misi tapu anu manchinkin kekunbaintan

²⁴januxun betsadi jaki nukuti tadi jiwe uke medan dintu medibi anudi tapu bebun ja dukun yusmaudi surkidi jawen kenwanti tapu jaki bin dekuti jatu tsaunmatan ²⁵Jehová uianyan jaska yunushina keska wakín jawen bin techiakeakexun jabiati deku keyutan ²⁶jawen yubani jancha unanmati aduti bau jaki juneti tadi puntea besuudi oro mane tapu pishta tsaunxun ²⁷jakixun ni pei ininti pepa kuati wakín jaska Jehová yunushina keska ni pei ininti eskadabes Moisin kuaxuntan

²⁸januxun jawen jikiti xui tadiwen kebenkin tadi jatu puntematan ²⁹januxun jaska Jehová yunushina keska wakín jawen jikiti xui besuudi jawen kenwanti chi tapu ewapa benanta jatu tsaunmaxun januxun Jehová benimawakin kenwankin inabu tesenxun menukin xekiwan dudu inankin keyunikiaki.

³⁰Jaska janu Dioski nukuti tadi jiwe inun jawen kenwanti chi tapu ewapa namakis anu janua chukiti mane kenchá ewapa jatu tsaunmaxun jaki unpax jatu manemakin matawamaken ³¹jaki chukiti unpaxwen Moisés inun Aarón inun jawen juni bakebu juchuki inun mepanutan ³²chipu jaska Jehová Moisés yunushina keska wai janu Dioski nukuti tadi jiwe jikikatsi inun jawen kenwanti chi tapu kemakatsi jatun tae inun jatun meken chukapaunibukiaki.

³³Jawen jenekin keyukin janu Dioski nukuti jiwe medan jawen kenwanti chi tapu jemaintin jatu wamatan jaki jatu kebenmabaunkatsi chibu jatu nichinmabaunxun tadiwen jatu dayabumatan jawen jikiti xuidi tadi betsawen jatu bepumatan

Janu jaki nukuti tadi jiwe Moisés axunshinanu nai kuinwen jua Jehová butunikiaki, na janchadan
(Nm 9.15-23)

janu Dioski nukuti tadi jiwe jidabi Moisin meneaya ³⁴jawaida janu jaki nukuti tadi jiwe anu nai kuinwen bututan Jehová jawen kushipawen

chaxa chaxa ikin tadi jiwe medan matajaida waken ³⁵jaska uin Moisés jaskatan jikitima inikiaki, janu Dioski nukuti tadi jiwe mamaki nai kuinwen achimakin keyua Jehová chaxa chaxa ikin matajaida wakenan.

³⁶⁻³⁸Badi ichapa jiwei maekubaunaibutian Israelin enabu dasibibun uiainbun janu jaki nukuti tadi jiwe medanua badidi Jehován nai kuin mamaki achima uinkin inun meshu medan chi jede jabanudi uinpaunibukiaki. Janua jatu maewakin iyuitian ja nai kuin jiwe mamakia benibainaya Israelin enabun jatun tadi jiwe pekatan nai kuin chibain ana maekubainpaunibukiaki. Jakia nai kuin benikainamaken janu niti ika manixun nai kuin beniai Israelin enabu kayuama manayuku bainpaunibukiaki.